

Jnu'un Yandios ni chaa Marcos

Jnu'un Juan, chaa skuanducha

(Mt. 3.1-12; Lc. 3.1-9, 15-17; Jn. 1.19-28)

¹ Ja'a keja'a jnu'un Jesús, ya kuu Cristo, Se'e Yandios. Ti jnu'un un kuu ja ni kii ya ja ni nama ya yo'o.

² Chi sia'an ni chaa profeta Isaías tutu, na ni ka'an da jnu'un Yandios undi na jana'an. Ti ni chaa da jnu'un Juan nuu tutu sia'an:

“Kunso'o ra”, kachi Yandios jiin Se'e ya, chi taji ri ndaja'a ri.

Koxnuu da ki'in da, ti xndaku da nuu yiví naa i, ja na kotu'va i ja kuu kiví jaa ra.

³ Ti kunde chaa un undi nuu ñu'un te'e un, ti ka'an ni'in da nuu yiví sia'an:

“Kotu'va ra naa ra, chi ja yajni chaa Jito'yo. Ti kuni ja na kaka ndaa ra”, kachi da, ni kachi Yandios jiin Se'e ya.

Ni kachi Isaías.

⁴ Yukan ti ni kundaa jnu'un Yandios nava ni kachi Isaías, chi ni kenda Juan undi nuu ñu'un te'e un. Ti kua'a yiví vekoyo ja na skuanducha da i, ti ni kachi da:

—Nakani ini nuu kuachi ra naa ra, ti kuanducha naa ra nava na kuanka'nu ini Yandios nuu kuachi ra —kachi da.

⁵ Ti kua'a yiví ñuu Jerusalén jiin kua'a yiví ndañuu Judea ni ka ja'an kunso'o i jnu'un ni ka'an Juan. Ti yiví un, nu ni ka kachi i ja ni ka nakani

ini i nuu kuachi i, yukan na ti skuanducha da i ini yucha Jordán.

⁶ Ti sa'ma Juan ni kuu jiin ixí camellu. Ni yí'í ñin sanchi ñíí chíi da. Ndeyu da ni kuu ndíkua'yí jiin nduxi ñuñu yuku.

⁷ Ti sia'an ni xndaku Juan nuu yí'í:

—Kuan kuyajni ñin chaa kuña'nu ga ja kuu ru'u. Ti kuña'nu ga da ja tu kuu kandu ri nuu da.

⁸ Ti maa da tu skuanducha da ro'o jiin nducha nanu sa'a ru'u, chí chaa un skuanducha da ro'o jiin Espíritu Santo naa ra. Ti yaa yukan kuu ya kuncha jiin ra naa ra —ni kachi Juan.

Ni janducha Jesús

(Mt. 3.13-17; Lc. 3.21-22)

⁹ Yukan ti ni kee Jesús ñuu Nazaret, ja kuu ndañuu Galilea. Ti ni skuanducha Juan ya ini yucha Jordán.

¹⁰ Nu ni kee Jesús ini nducha un, ni ti nuña andí'í nuu kancha Yandios, ti ni jini Jesús ja vaji Espíritu Santo síkí ya, ti kaa ya nanu kaa ñin sata.

¹¹ Ti ichi andí'í un ni kii ñin ndusu nu ni ka'an Yandios jiin Jesús:

—Ro'o kuu Se'e ri ja kunda'u xaan ini ri, ti kusíí xaan ini ri jiin ra —ni kachi Yandios.

¹² Yukan ti ni yínda'a Espíritu Santo un maa Jesús undi nuu ñu'un te'e un.

¹³ Ti yukan ni kuncha ya uu xiko kí'í nuu ka iyo kí'í yuku un. Ti ja'u'u un ni kuni ska'an Jesús ja na sani'in ini ya nuu Yandios. Ko ni kikoyo ángel, ja ka kuu ndaja'a Yandios, ti ni ka chindee i maa ya.

Ni keja'a xndaku Jesús jnu'un Yandios

(Mt. 4.12-17; Lc. 4.14-15)

¹⁴ Ti yukan ni ka chondee da Juan vekaa, ti Jesús ni nandeokuñi ya ñuu Galilea. Ti yukan ni xna'an ya jnu'un Yandios nuu yivi naa i, ti ni kachi ya:

¹⁵ —Ja ni jaa kivi nuu ta'u Yandios jniñu nuu ni tu'u ñuyivi. Vijna na ti nakani ini naa ra ti kandixia jnu'un ichi Yandios, chi yukan kuu ñn ichi va'a —ni kachi ya.

*Ni kana Jesús xini kuun chaa ka jñi chāká
(Mt. 4.18-22; Lc. 5.1-11)*

¹⁶ ñn kivi ni ya'a Jesús yu'u lago Galilea, ti ni jini ya ka'iin Simón jiin ñani da Andrés, ka jñi da chāká jiin ñn ñunu,

¹⁷ ti ni kana ya xini da:

—Kundikun ru'u naa ra, na cho'o. Ni ka jñi xaan ra chāká, ko vijna ru'u na xna'an ri ro'o nasa nastutu ra yivi, ti xna'an ra yivi un maa jnu'un Yandios kandixia i ru'u —ni kachi ya.

¹⁸ Ti luego ni, ni ka xndoo da ñunu da, ti kuankoyo da jiin Jesús.

¹⁹ Ni jika ya ti'li ga. Yukan ni jini ya nuu Jacobo jiin Juan, se'e yñi Zebedeo, ka nachaa da ñunu da nuu ñn barco.

²⁰ Suni ni kana ya xini da:

—Ña'an na cho'o —kachi ya.

Ti chaa un ni ka xndoo da tata da Zebedeo ini barco un jiin muzu da, ti kuankoyo da jiin Jesús.

*Ni keni'in Jesús ñn tachi xaan jna'an ñn chaa un
(Mt. 7.28-29; Lc. 4.31-37)*

²¹ Ni jakoyo da ñuu Capernaum. Ti ni kivi Jesús ini veñu'un Israel jaña'an ñn kivi ka ndetatu yivi Israel. Ti ni xna'an ya jnu'un Yandios nuu i.

²² Ti so ka naa ini i ni ka ñuso'o i jnu'un ni ka'an ya, chi ni xna'an va'a ya nuu i, nanu ñin chaa ndiso jniñu nuu Yandios. Ti chaa ka xna'an ini veñu'un un, tu ka xna'an da nanu ni xna'an maa Jesús.

²³ Ti yukan kande ñin chaa jna'an tachi xaan ini veñu'un un, uni ni kanajiin ko'o da, ti ni kachi da:

²⁴ —Kuxio ni nuu na naa na, ni'in Jesús, chaa ñuu Nazaret. ¿Ndoó kivi nduu ni jiin na, xi vaji ni ja xnaa ni saña nu? —ni kachi da.

²⁵ Ti Jesús ni nduxaan ya nuu tachi xaan un, ti ni kachi ya:

—Kasi yu'u, ti xndoo chaa ja'a —ni kachi ya.

²⁶ Ti tachi xaan un ni sa'a ja na kuyi'i chaa un, ti undi ni kanajiin ko'o ti ni kee kua'an.

²⁷ Ti so ni ka sa'u ini yivi un ja so ka naa ini ka nde'e i, ti ka jikajnu'un jna'an i:

—¿Na jnu'un kuu ja'a, xi na sa'an kuu ja'a? ¿Xi kuña'nu chaa un ja undi tachi xaan un ka jandatu nuu da, ti ka kekoyo kua'an nu? —ni kachi i naa i.

²⁸ Ti yachi xaan ni jichanuu jnu'un Jesús ni ñuu Galilea.

Ni sa'a Jesús tajna nana chiso Simón

(Mt. 8.14-15; Lc. 4.38-39)

²⁹ Yukan ni ka kekoyo da ini veñu'un un, ti kuankoyo da ichi ve'e Simón jiin Andrés. Ti Jesús kua'an ya jiin Jacobo jiin Juan jiin uu ga chaa ka skua'a jiin ya, nu ni ka jakoyo da ve'e un.

³⁰ Ti nana chiso Simón ku'u ña. Katuu ña jiin kue'e kiji xaan, ti ni ka kachi da nuu Jesús ja ku'u ña.

³¹ Luego ni kivi ya nuu katuu ña. Ni jniñ ya nda'a ña, ni ndokani ya maa ña, ti ni nduva'a ni ña jiin

kue'e kiji un, ti ni ndokuiñi ña. Yukan ti ni sa'a ña ndeyu ni yaji ya jiin uu ga yivi un.

Ni sa'a Jesús tajna tjni yivi ka ku'u
(Mt. 8.16-17; Lc. 4.40-41)

³²⁻³³ Nu ni kee ndikandii ti ni ki'vi, ti tendi'i yivi ñuu un, ni ka chitu ndii ni yuxe'e nuu kancha Jesús. Ka yinda'a i kua'a yivi ka ku'u jiin chaa ka jna'an tachi xaan.

³⁴ Ti Jesús, ni sa'a ya tajna kua'a yivi ka ku'u un. Suni ni kenchaa ya kua'a tachi xaan. Ko tu ni ja'a ya jnu'un ja ka'an tachi xaan un, chi ka jini na se'e kuu ya.

Ni xna'an Jesús jnu'un Yandios ñuu Galilea
(Lc. 4.42-44)

³⁵ Jaña'an inga kivi, ni iña ga, ni ndoko Jesús ti kua'an ya nuu ñu'un te'e nuu tu iyo yivi. Ti yukan ni jikanta'u ya nuu Yandios.

³⁶ Ko Simón jiin uu ga da, kuan nunduku da ya naa da.

³⁷ Nu ni ka nani'in da ya, ti ni ka kachi da jiin ya:
—Kua'a xaan yivi ka jikajnu'un ni'in —ni ka kachi da.

³⁸ Ti ni kachi ya:

—Na cho'o uu ga ñuu ka'iin yajni ja'a, ti na xna'an ri jnu'un Yandios nuu i. Chi ja yukan kuu ja ni taji Yandios ru'u vaji ri —ni kachi ya.

³⁹ Yukan na ti kua'an ya ni ñuu Galilea, ni ka'an ya jnu'un Yandios ini veñu'un yivi Israel jiin taka nda'a ñuu un, ti kenchaa ya tachi xaan ka jna'an sava yivi un naa i.

Ni sa'a Jesús tajna #n chaa te'yu xaan jiin ndi'yi
(Mt. 8.1-4; Lc. 5.12-16)

⁴⁰ ñin kivi ni tu'va ñin chaa jna'an kue'e ndi'yi te'yu. Ni jakunjiti da nuu Jesús, ti ni kanda'u da jiin ya:

—Nu kuni ni, ti kuu sandoo ni saña jiin kue'e jna'an na ja'a—ni kachi da.

⁴¹ Ti ni kunda'u ini ya maa da, ni skaa ya nda'a ya, ni kue'e ya maa da, ti ni kachi ya jiin da:

—Kuni ri, na ndundoo ra vijna —ni kachi ya.

⁴² Nu ni ka'an ya sia'an, ti ni nduva'a ni chaa un.

⁴³ Yukan na ti ni'in xaan ni xndaku ya nuu da, ti ni kachi ya:

⁴⁴ —Koto kani ra jnu'un nuu ni ñin yivi ja sia'an ni sa'a ri tajna ro'o. Kua'an nuu sutu Israel un, ti na nde'e da ro'o. Nu ni nde'e da ro'o, ti kunda'a ja soko ra nuu Yandios siki ja, ja ni ndundoo ra, nava kachi ley Moisés. Ti na soko sutu un nuu Yandios, nava na kuni yivi ja, ja ni kenchaa ndi'yi un ro'o —ni kachi ya.

⁴⁵ Ko tu ni jandatu chaa un jnu'un ni ka'an Jesús. Ti kua'an da, jani da jnu'un nuu taka yivi nava ni jna'an da. Ja yukan kuu ja tukaa ni kuu kivi ndijin Jesús taka ñuu, chi jini ya ja nu na kivi ndijin ya, ti kinkoyo kua'a xaan ga yivi nuu ya. Ja yukan kuu ja ni jikonuu ya nuu ñu'un te'e nuu tukaa iyo yivi, ko undi yukan ni ka kikoyo kua'a yivi taka ñuu nuu kande ya.

*Ni sa'a Jesús tajna ñin chaa tikuku
(Mt. 9.1-8; Lc. 5.17-26)*

2

¹ Nu ni kuu ga kivi ni nandeokunĩ Jesús ñuu Capernaum. Ti ka jani da jnu'un ja, ja ni nchaa tuku ya.

² Yukan ti vekoyo kua'a xaan yivi nuu kancha ya, ja tukaa ni kujaa ve'e un, chi ni chitu ndii ni tu'u undi fuera. Ti yukan ni xna'an ya jnu'un Yandios nuu i.

³ Ko vekoyo ga yivi, ti kuun da ka ndiso ñin chaa tikuku nuu ñin yúú.

⁴ Ka kuni kunda'a da chaa un undi nuu kancha Jesús, ko tu kuu ya'a da ja xaan chitu yivi. Ti ni ka skaa da chaa ku'u un ichi xini ve'e. Ni ka kenchaa teja un, ti ni ka sino da chaa ku'u un nuu kancha Jesús, ti yukan ni ka sino da chaa un.

⁵ Ti nu ni jini Jesús ja ka kandixia da maa ya ja kuu sa'a ya tajna, ti ni kachi ya jiin chaa tikuku un:

—Nda'u se'e ri, ja ni janka'nu ini ri nuu kuachi ra —ni kachi ya.

⁶ Ti yukan ka'iin tijni chaa ka xna'an ini veñu'un yivi Israel. Ti nu ni ka jiniso'o da jnu'un ni ka'an Jesús jiin chaa tikuku un, ni ka ndo'o ini da:

⁷ “¿Nau ja kuu ñin chaa ja'a ja ndo'o ini da ja kuu da Yandios, ti ka'an da siki Yandios ja ka'an da sia'an? Ti ja'a tu iyo ni ñin ja kuanka'nu ini nuu kuachi yo, chi vajnu'un ni maa Yandios”, ni ka ndo'o ini da.

⁸ Ko maa Jesús ja ni jini ya ndoo ka ndo'o ini da, ti ni kachi ya jiin da:

—¿Ndo'o ka ndo'o ini ra sia'an?

⁹⁻¹⁰ Chi na kachi ri ja ru'u kuu maa Se'e Yivi Ñuyivi, ti ndisojniñu ri ja kuanka'nu ini ri nuu

kuachi yiví naa i. Vijna ti na stuu ri ñn jniñu sa'a ri ja'a —ni kachi ya.

Yukan na ti ni kachi ya jiin chaa tikuku un:

¹¹ —Ndokuni, nastuu yúú ra, ti kuano'on ve'e ra —ni kachi ya.

¹² Ti chaa un ni ki'in da yúú da, ti ni kee da kua'an da. So ni ka naa ini yiví un, ti ni kuvaa i ni ka nakanajaa i Yandios:

—¡Ka'nu ñn jniñu sa'a Yandios ja tu ka jini kuiti yo ñn jnu'un sia'an undi vijna! —kachi i naa i.

*Ni kana Jesús xini Leví ja na ki'in da jiin ya
(Mt. 9.9-13; Lc. 5.27-32)*

¹³ Yukan na ti kua'an tuku Jesús yu'u lago Galilea, ti ni ka taka kua'a xaan yiví nuu ya. Ti ni xna'an ya nuu i.

¹⁴ Ichi kua'an ya ni ya'a ya yajni ñn oficina nuu kinya'u puesto. Yukan nukoo Leví, se'e yí Alfeo, kinya'u da puesto. Ti ni kachi Jesús jiin da:

—Ña'an na cho'o, ti kundikun ra ru'u —kachi ya. Ti ni ndokuñi Leví, ti kua'an da jiin ya.

¹⁵ ñn kivi ni kana Leví Jesús ja na ki'in ya ve'e da ja na kee ya staa jiin chaa ka skua'a jiin ya, jiin chaa ka kinya'u puesto, jiin chaa tu ka siuku jnu'un ka ka'an chaa ka xna'an ini veñu'un Israel.

¹⁶ Ti yukan ka'iin chaa ka kuu maestro ja ka xna'an ley, ka kuu da maa chaa fariseo. Nu ni ka jini da ja yee Jesús staa jiin taka yiví un, ti ni ka kachi da jiin chaa ka skua'a jiin ya:

—¿Ndoo yee Jesús staa jiin taka chaa ka kinya'u puesto, suni jiin chaa tu ka siuku jnu'un ka ka'an ri yukan? —kachi da.

¹⁷ Ni jiniso'o Jesús jnu'un ka ka'an da, ti ni kachi ya jiin da:

—Chaa ku'u kuu chaa nandi'i ñin médico, ansu chaa iyo ndendajnu. Ru'u ni chaa ri ja ka'an ri jnu'un Yandios nuu yivi ka nakuni i kuachi i, ti ansu yivi ka ndo'o ini ja ka iyo ndoo jiin kuachi i —kachi ya.

Ka jikajnu'un da Jesús siki jnu'un koo ndicha ini (Mt. 9.14-17; Lc. 5.33-39)

¹⁸ Ni kuu ja ni jaa ñin kivi ka iyo ndicha ini taka chaa fariseo jiin chaa ka skua'a jiin Juan, chaa skuanducha. Ti sava yivi un ni ka chakoyo i nuu Jesús, ti ni ka jikajnu'un i ya:

—¿Ndoos chaa ka skua'a jiin Juan jiin chaa ka skua'a jiin chaa fariseo, ka iyo ndicha ini da, ti chaa ka skua'a jiin ni, ndoo tu ka iyo ndicha ini da nusa? —kachi da.

¹⁹ Ti ni kachi Jesús:

—¿Ti kuu koo ndicha ini yivi ka'iin ñin viko nanda'a xi tuu nu? Ti nu kancha novio un jiin i, tu kuu ku'iin ndicha i viko un.

²⁰ Suni nu kancha ri jiin chaa ka skua'a jiin ri, tu kuu koo ndicha ini da. Ko jaa ñin kivi nu na kuxio ri ki'in ri, ti kivi un sa na koo ndicha ini da.

²¹ Sia'an kuu ja tu kuu chajna'an ra jnu'un xna'an ri jiin jnu'un jana'an. ñin ni kuu ja nachaa yo ñin pedazo sa'ma jaa, ti ndundoo ga nuu ñin sa'ma tu'u. Chi sa'ma jaa un ndiyi, ti kuu ka'nu ga yau nuu sa'ma tu'u un.

²² ñin ni kuu ja chu'un yo vino jaa ini ñii tu'u, chi vino jaa un ndata ti ka'ncha ñii un, ti xnaa yo ndinduu. Vanuxia sia'an ja chu'un yo vino jaa chii

ñi jaa. Yukan kuu ja tu kuu chajna'an ra jnu'un ri jiin jnu'un jana'an—kachi ya.

*Jniñu ni ka sa'a ndaja'a Jesús ñin kivi ndetatu
(Mt. 12.1-8; Lc. 6.1-5)*

²³ ñin kivi ndetatu ni ya'a Jesús jiin chaa ka skua'a jiin ya, ti ni ka ya'a da ñin ñu'un nuu kaa triu. Ti chaa un ni ka keja'a ka jnu'un da yoko triu un, ti ka yaji da.

²⁴ Ni ka jini chaa fariseo un jniñu ka sa'a chaa un, ti ni ka kachi da jiin Jesús:

—Nde'e, ¿ndoo ka sa'a chaa ka jika jiin ra jniñu ja tu kuu sa'a yo ñin kivi ndetatu nu? —kachi da.

²⁵ Ti ni kachi Jesús jiin da:

—¿Ndoo ka ka'an ra sia'an, xi tu ni ka ka'u ra ja ni jna'an tata yo David na jana'an, na ni ji'i da soko jiin chaa ni kunchuku jiin da un nu?

²⁶ Ni kivi da ini ve'e Yandios, ni jikanta'u da nuu sutu Abiatar, ti ni ki'in da staa stila ni soko sutu un nuu Yandios. Ni yee da jiin chaa ni kunchuku jiin da, ja tu kuu kaji sava'ni ga yivi, ti xna'an ley Moisés ja ñini sutu kuña'nu kuu, ja kaji staa stila un.

²⁷ Nusa ti iyo va'a jniñu ka sa'a chaa vekoyo jiin ri. Chi ni sa'a Yandios kivi ndetatu un ja na kendo kuu ñin kivi sa'a yo ja va'a, ti ansu ja na sa'a yo ja ii xaan.

²⁸ Vanuxia ru'u kuu maa Se'e Yivi Ñuyivi, ti kuña'nu ga ri ja na ta'u ri jniñu nasa sa'a yivi kivi ndetatu —ni kachi ya.

*Ni nduva'a ñin chaa ni ichi nda'a
(Mt. 12.9-14; Lc. 6.6-11)*

3

¹ Ni kiví tuku Jesús ini ñin veñu'un yiví Israel, ti yukan kande ñin chaa ni ichi nda'a.

² Suni yukan kanchuku chaa fariseo ka iyo listo da ja nu sa'a Jesús tajna kiví ndetatu un. Ti nu na sa'a ya tajna, ka ndo'o ini da ja kankuachi da ja'a ya ja jani'in ini ya nuu ley.

³ Ko ni kachi Jesús jiin chaa ku'u un:

—Ndokuñi, ti kundichi ra ma'ñu un —kachi ya.

⁴ Yukan ti ni jikajnu'un ya yiví un: —¿Nasa kachi ley ndoo sa'a yo vijna kiví ndetatu nusa? ¿Iyo va'a ja sa'a yo tajna ñin chaa ku'u xi kua'a ini yo na kuū da nu? —kachi ya.

Ti chaa un tu ni ka ka'an kuiti da.

⁵ Yukan ni kití ini Jesús ni nde'e ya nuu da, ti ni kukui'ya xaan ini ya, chi ni jini ya ja tu ka ñu'un nda'u kití ini da. Ti ni ka'an ya jiin chaa ku'u un:

—Skaa nda'a ra —kachi ya.

Ni skaa da nda'a da. Ti luego ni, ni nduva'a.

⁶ Yukan ti ni ka kekoyo chaa fariseo un, ka sa'a da ñin junta jiin chaa ka yí'i i jiin partido Herodes. Ka ndajnu'un da nasa kuu ka'ni da Jesús.

Ni kataka kua'a xaan yiví yu'u lago

⁷⁻⁸ Kua'an Jesús ichi yu'u lago Galilea jiin taka chaa ka skua'a jiin ya. Ti ka ndikun yiví kua'a un kuankoyo i suni, chi ni ka jini i taka jniñu ña'nu sa'a ya. Ni kikoyo yiví kua'a taka ñuu nanu ñuu Galilea, ñuu Jerusalén, ñuu Idumea. Suni yiví kanchuku inga yu'u yucha Jordán, jiin suni yiví ñuu Tiro jiin Sidón.

⁹⁻¹⁰ Ti sa'a ya tajna taka yiví ka ku'u ni ka chakoyo un, ko so ka chindajna'an maa ni ga yiví

un ja ka kuni tu'va i nuu ya, ti jnii i vasu ti'li sa'ma ya, ja nduva'a i jiin sava'a ni ga kue'e ka ndo'o i. Ko ja xaan chitu yivi un, ti ni kachi ya jiin chaa ka skua'a jiin ya ja na satu'va da in barco lulu, na kinkivi ya nava tu kaxin yivi un ya.

¹¹ Suni ni kikoyo kua'a yivi ka jna'an tachi xaan. Nu ni ka jini nuu ya, ti ni ka nduva nuu ja'a ya. Ti ni ka kanajiin:

—¡Ro'o kuu Se'e Yandios! —kachi naa.

¹² Ko maa ya ni ka'an ni'in ya:

—Tu nau ja kuu ro'o ja ka'an ra ja ru'u kuu Se'e Yandios —kachi ya.

*Ni nakaji Jesús ndi uxi uu chaa kuu ndaja'a ya
(Mt. 10.1-4; Lc. 6.12-16)*

¹³⁻¹⁴ Yukan ti ni kana ya taka chaa ka skua'a jiin ya, ti kua'an ya jiin da undi yuku un. Yukan ni nakaji ya uxi uu ndaja'a ja na nakujin da jiin ya. Ti ni kachi ya jiin chaa un naa da ja na taji ya da kinkoyo da taka ñuu, ti ka'an da jnu'un Yandios nuu yivi naa i.

¹⁵ Ti kundiso da jniñu ña'nu ja kenchaa da tachi xaan ka jna'an sava yivi.

¹⁶ Ti ja'a ka kuu ndi uxi uu chaa ni nakaji ya: Simón ja ni skonani ya da Pedro;

¹⁷ Jacobo jiin Juan, se'e yii Zebedeo, ja suni ni skonani ya da naa da Boanerges, ja kuni ka'an se'e taja;

¹⁸ Andrés; Felipe; Bartolomé; Mateo; Tomás; Jacobo, se'e yii Alfeo; Tadeo; Simón, ja yii da nuu partido cananista;

¹⁹ jiin Judas, chaa ñuu Cariote, chaa ni nakua'a Jesús nuu chaa ka jito u'u ya.

*Ka chakuachi da ja'a Jesús ja ni nduu ku'u ya
(Mt. 12.22-32; Lc. 11.14-23; 12:10)*

²⁰ Nu ni ni'in ya chaa kujin jiin ya, ti ni nan-deokuñi ya jiin da naa da ñn ve'e. Ti yachi ni kataka tuku yivi kua'a ve'e un, ja tu ka ja'a i jnu'un ja kaji ya staa jiin ndaja'a ya, chi ka jikanta'u i ja na chindee ya maa i.

²¹ Nu ni ka jini taka jna'an ya jnu'un ja sa'a ya taka nuu jniñu un, ti kuan nuki'in da ya, chi ni ka ndo'o ini da ja ni nduu ku'u ya.

²² Ti suni chaa ka xna'an ley ini veñu'un yivi Israel ja vekoyo da undi ñuu Jerusalén, ni ka kachi da:

—Yi'i chaa ja'a jiin maa ja'u'u un. Yukan kuu ja jiin sivi maa ja'u'u un keni'in da tachi xaan un nuu yivi —ni ka kachi da.

²³ Yukan ti ni kachi Jesús:

—Kunso'o naa ra na ka'an ri. ¿Va nu kuu keni'in chaa u'u un tachi xaan ki'in ti nu ndaja'a da ka kuu nu?

²⁴ Suni nu ndaja'a ñn gobierno, na kusin ini da naa da ti keja'a kanaa da, ti gobierno un tu kuñi.

²⁵ Ti nu ñn familia keja'a kanaa naa, ti familia un tu kuu kunchuku mani.

²⁶ Suni sia'an kuu jiin chaa u'u un. ¿Xi ka jani ini ra ja na kuñi da nu na keni'in da tachi xaan un ki'in, nusa?

²⁷ Ko ja siki maa chaa u'u un, sa'a yo nanu ja ñn ni kuu nu ñn chaa ni'in xaan, kuni sakui'na yo ve'e da, ti nu kancha da, ti xnakan ku'ni yo da, sa sakui'na yo ve'e da. ñn ni kuu ja ni kundee ri jiin chaa u'u un, chi ni keni'in ri ndaja'a da un kua'an.

28 Jandaa na kachi ri ja iyo jnuka'nu ini Yandios nuu yivi ka sa'a taka nuu kuachi. Suni yivi ka ka'an ndeva'a, vatu ni saka'nu ini Yandios nuu i.

29 Ko yivi na kusikinchara maa Espiritu Santo jiin jnu'un ndeva'a kuiti, jankivi saka'nu ini Yandios nuu i —kachi ya.

30 Sia'an ni ka'an Jesús, chi chara ka xna'an ini veñu'un Israel ni ka ka'an ja ja ni nduu u'u ya.

Nana ya jiin ñani ya kuni ka ka'an i jiin ya.

(Mt. 12.46-50; Lc. 8.19-21)

31 Ti yukan ni chara nana ya jiin ñani ya, ti ni ka kendo ña fuera. Yukan ni tatu ña ñin yivi ni kaxnu'un nuu ya.

32 Ti yivi kanchuku jiin ya ni ka kachi:

—Nana ni jiin ñani ni ka ka'iin da fuera. Ka kuni ka'an da jiin ni —ni ka kachi da.

33 Ti ni kachi ya:

—Na kachi ri nuu ra naa ra nau ja kuu nana ri, ti nau ja ka kuu ñani ri —ni kachi ya.

34 Ti ni nde'e ya nuu taka yivi kanchuku jiin ya yukan, ti ni kachi ya:

—Ja'a kanchuku yivi ka kuu nana ri jiin ñani ri.

35 Chi sava'ni ga yivi na siuku jnu'un Yandios, yukan kuu nana ri, kuu kua'a ri, ti kuu ñani ri —ni kachi ya.

Jnu'un ñin chara saka triu

(Mt. 13.1-9; Lc. 8.4-8)

4

1 Inga kivi ni keja'a xna'an Jesús nuu yivi yu'u lago Galilea. Nu ni ka taka kua'a xaan tonto yivi nuu kande ya, ni kivi ya nuu ñin barco ka'nu, ti ni

kuxio ya ti'li nuu nducha un. Ti yivi un ni ka kendo i nuu ñiti yu'u nducha un.

² Ni nukoo ya nuu barco un ti ni xndaku ya nuu yivi naa i, ti jnu'un ni xndaku ya kuu ja'a:

³ —Chunso'o naa ra na kachi ri jnu'un ñn chaa ni saka triu.

⁴ Ti nuu kua'an da jacha da triu, sava triu un ni nukoyo ini ichi. Ti ni chakoyo saa ni ka nachii ti.

⁵ Uu ga triu un ni nukoyo nuu kanchuku yaxin ñu'un nuu yuu ti ni kaña yachi, ko tu ni kee kunu yo'o i.

⁶ Ko nu ni kaña ndikandii, ti ni ichi triu un.

⁷ Uu ga ni nukoyo nuu yi'i kua'a yo'o nu'iñu, ti ni kaña triu un, ko nu ni nakua'nu numa nu'iñu un ti tukaa ni ja'nu triu un.

⁸ Ko sava ga triu ni nukoyo nuu yi'i kokon ñu'un, ni kaña ti va'a ni ja'nu, ti ni kuu xaan. Sava ni nakua'a oko uxi triu ja ñn triu lulu un, ti sava ni nakua'a uni xiko, ti uu ga ni nakua'a ñn ciento —kachi ya.

⁹ Yukan ti ni kachi Jesús:

—Yivi chunso'o ti na chunso'o i —ni kachi ya.

Siki jnu'un ni ka'an Jesús

(Mt. 13.10-17; Lc. 8.9-10)

¹⁰ Ti nu kuankoyo yivi un, ti ni ka tu'va ndi uxi uu chaa ka kuu ndaja'a ya jiin uu ga yivi ni ka kendo un, ti ni ka jikajnu'un da ya nasa kuni ka'an jnu'un ni xndaku ya un.

¹¹ Ti ni kachi ya:

—Ja ni xna'an Yandios nuu ra naa ra nava ta'uu ya jniñu, ko ja kuu yivi tu kandixia, na xndaku ri nuu i jiin jnu'un ja'a.

¹² Chi vasu ñuso'o i jnu'un ka'an ri, ti nde'e i jniñu sa'a ri, ko tu chaku ini i. Tu chaku ini i chi tu kuni xndoo i jnu'un kue'e ka ka'an i. Ti nu tu kuni nakani ini i nuu kuachi i, ti tu saka'nu ini Yandios nuu i —ni kachi ya.

*Nava kuni ka'an jnu'un chaa saka triu
(Mt. 13.18-23; Lc. 8.11-15)*

¹³ Suni ni kachi ya jiin da:

—Ti nu tu ni ka chaku ini ra jnu'un ni ka'an ri un, ni tu kuu chaku ini ra uu ga jnu'un na ka'an ri nusa.

¹⁴ Ka'an ri ja nanu kuu ñn chaa saka triu, suni sia'an kuu chaa xndaku jnu'un Yandios nuu yivi naa i.

¹⁵ Chi sava yivi kuu i nanu triu ni nukoyo ini ichi un, chi ni ka ñuso'o i jnu'un Yandios, ti jaku ni kivi ti ni kundee ja'u'u un jiin i, ti naa ini i jnu'un Yandios.

¹⁶ Uu ga yivi kuu i nanu triu ni nukoyo nuu kanchuku yaxin ñu'un nuu yuu. Chi ka ñuso'o i jnu'un Yandios, ti kusii xaan ini i jiin.

¹⁷ Ko tu kukutu jnu'un Yandios ini i, ti yachi ka nandeokava i siki ya, nuu ka jna'an i nundo'o siki ja ka jito u'u yivi maa i, ja ni ka kandixia i jnu'un ya.

¹⁸ Ti uu ga yivi kuu i nanu triu ni nukoyo nuu iñu un. Chi ka ñuso'o i jnu'un Yandios.

¹⁹ Ko ka ndo'o xaan ini i jniñu iyo nuu ñuyivi ja'a, ja ñukuu ini i kuu riko i. Ti taka yukan sa'a ja jasi ini yivi un, ti naa ini i jnu'un un.

²⁰ Ti sava ga yivi un kuu i nanu triu ni nukoyo nuu yivi ñu'un va'a. Ni jiniso'o i jnu'un Yandios, ti ni kandixia ndaa kuiti i. Kuu i nanu ñn triu ja ni

nakua'a oko uxi, xi uni xiko, xi ñn ciento triu, chi siuku ndaa i jnu'un Yandios. Yukan kuu ja kuni ka'an jnu'un chaa saka triu un —ni kachi ya.

Jnu'un ñn yiti
(Lc. 8.16-18)

²¹ Ti ni kachi tuku ya jiin da:

—Nu skuikun yo ñn yiti, ti tu kani yo chii ñn cajón, ni tu kani yo chii ñn jito. Chi su'va kani yo nuu sukun ja na kundijin va'a.

²² Suni sia'an kuu jiin jniñu kua'a ri nuu ra naa ra, chi tu kendo sa'yi. Vasu vijna ñu'ni tu jini ni ñn yivi, ko jaa ñn kivi nu kenda ndijin ti kuni kua'a yivi naa i.

²³ Yivi ñuso'o ti na chunso'o i nasa kuni ka'an jnu'un ja'a —kachi ya.

²⁴ Suni ni kachi ya jiin da:

—Chunso'o va'a jnu'un ka'an ri. Nu jiin ku'va un chikua'a ra, ti suni sia'an jiin ku'va un nachikua'a Yandios nuu ra. Ti vi'ga kua'a ya nuu ra nu na chunso'o ra.

²⁵ Chi yivi ni chunso'o ti chindee Yandios maa i ja na ni'in ga i inijnuni i. Ko yivi tu chunso'o va'a, su'va kenchaa ya jnu'un va'a ni kendo inijnuni i.

Jnu'un ñn triu ni saka

²⁶ Ti ni ka'an ga Jesús jiin da naa da:

—Ka'an ri ñn jnu'un nasa kuu kivi yivi nda'a Yandios ja na ta'u ya jniñu nuu i. Ti yukan kuu nanu triu ni saka nuu ñu'un.

²⁷ Chi nu ni ndi'i ni saka da triu un, ti siin siin jniñu sa'a da taka kivi. Ti nu ni kuu una uxi kivi, ti keja'a jinu, ti ja'nu kua'an, vasu tu jini da nasa ja'nu triu un.

²⁸ Chi maa ñu'un un sa'a ja ja'nu. Xnakan jinu ti keja'a ja'nu. Yukan na ti kaña yoko ti jaki'i triu chii.

²⁹ Ti nu ja ni kuaan triu un, ki'in da vusu, ti kin ka'ncha da —kachi ya.

Jnu'un ñin ndikin lulu

(Mt. 13.31-32; Lc. 13.18-19)

³⁰ Siin Jesús ka'an ya ti ni kachi ya:

—Ka'an ri inga jnu'un nasa kuu kivi yivi nda'a Yandios ja na ta'u ya jniñu nuu i.

³¹⁻³² Kuu nanu ñin ndikin lulu xaan, ko nu ni xndee yo ti keja'a ja'nu. Ja'nu nanu ñin nuyukun, ti undi saa un ka sa'a ti taka ti chii nda'a yujnu un —kachi ya.

(Mt. 13.34-35)

³³ Taka jnu'un yukan ni jajniñu Jesús nu ni xndaku ya jnu'un Yandios nuu yivi naa i, ja na kendo'o ini i.

³⁴ Ti mani sia'an ni xna'an ya nuu yivi naa i. Ko nu ni ka kendo maa ni ga ndaja'a ya, ti ni xndaku ya nasa kuni ka'an taka jnu'un un.

Ni sa'a Jesús ja na jakiñi ñin tachi sau nuu lago Galilea

(Mt. 8.23-27; Lc. 8.22-25)

³⁵ Yukan ti ja'ini kivi un ni kachi Jesús jiin ndaja'a ya:

—Cho'o naa yo inga yu'u lago —kachi ya.

³⁶ Yukan ti ni ka kivi da ini barco nuu kande ya. Ni ka kanxia'u da jiin yivi un ti ni ka jika da jiin barco un nuu lago. Suni kuankoyo uu ga barco jiin da naa da.

³⁷ Ti ni keja'a ñin tachi sau xaan tonto nuu lago un. Ti ni keja'a kiví nducha ini barco da, ti kuni chitu jiin nducha.

³⁸ Ko Jesús kixi kixi ni ya ichi jata barco. Ti ni ka xndoto chaa un ya, ti ni kachi da:

—Maestro, tu ndí'i ini ni ja kuni keka'nu yo chii nducha, ti xaan kixi kixi ni —kachi da.

³⁹ Yukan ni ndokuiñi Jesús, ti ni kachi ya jiin tachi sau xaan un jiin lago un:

—Jakuñi ti na'in ni koo ra —ni kachi ya.

Yukan ti na'in kuiti ni ni kuu.

⁴⁰ Yukan ti ni kachi ya jiin ndaja'a ya:

—¿Ndoo xaan ka yu'u ra? ¿Xi kaja ni ini ra ja tu kuu chindee Yandios ro'o naa ra nu? —kachi ya.

⁴¹ Ti ndaja'a ya un ni ka yu'u xaan da, ti ka ndajnu'un da naa da:

—¿Nusa ti naa chaa kuu chaa ja'a ja undi tachi sau un jiin mar un ka jandatu i nuu da? —kachi da naa da.

*Chaa ka jna'an tachi xaan ñuu Gadara
(Mt. 8.28-34; Lc. 8.26-39)*

5

¹ Yukan ti ni ka jakoyo da inga yu'u lago, ñuu Gadara.

²⁻³ Nu ni kee Jesús ini barco, ni kenda ñin chaa jna'an tachi xaan. Ti chaa un nchaa da taka nuu ka ñunduji ndiyi. Ni nduu loco xaan da, chi ni ñin yivi tu kundee jiin da vasu na kundikun da jiin cadena.

⁴ Tijni xaan jinu ni ka ju'ni da chaa un jiin cadena, kuu nda'a da kuu si'in da, ko kundee da ja'ncha da, ti sakuachi da cadena un.

⁵ Kuu nduu kuu ñuu kanajiin da yaku da chii yuku un jiin taka nuu ñaña ndiyi, ti stuji da maa da jiin yuu.

⁶ Ko nu ni jito nchaa jika da ja vaji Jesús, ni ja'a da corri, ti kua'an da undi nuu vaji ya. Ni jakunjiti da,

⁷ ti ni kanajiin ko'o da:

—Ni'in Jesús, Se'e Yandios ja kancha undi andivi, jikanta'u xaan tonto na nuu ni ja koto xndi'i ni ini na —kachi da.

⁸ Sia'an ni kanajiin da, chi ja ni ta'u ya jniñu ja na xndoo tachi xaan un maa da.

⁹ Ti ni jikajnu'un ya sivi da:

—¿Ndoos nani ra nusa? —kachi ya jiin da.

Ti ni kachi da:

—Legión nani na, chi kua'a xaan jna'an na —kachi da.

¹⁰ Ti kanda'u da jiin Jesús ja tu keni'in ya tachi xaan un ki'in inga ñuu yukan.

¹¹ Ti yajni yukan ka'iin kua'a xaan kini ka yee ti yuku jika yuku un.

¹² Ti tachi xaan un ni ka kanda'u jiin Jesús:

—Kua'a ni jnu'un na kinkoyo na jiin kini un naa na —ni ka kachi.

¹³ Yukan ti ni ja'a ya jnu'un ja na kinkoyo. Ti tachi xaan un ni xndoo chaa un ti ni ka jankuncha jna'an jiin kini un naa ti. Ka iyo yajni uu mil kiti un. Ti ni ka ja'a ti corri ni ka nukoyo ti ñin xa'va, ti ni ka kivi ti nuu lago un ni ka ji'i ti.

¹⁴ Ti yivi ka ndito kini un, ni ka yu'u xaan. Ni ka ja'a corri ni ka kaxnu'un nuu yivi ñuu jiin yivi kanchuku ranchu. Ti ni ka kikoyo yivi kua'a ni ka kin nde'e ndoo ni kuu.

15 Nu ni ka jakoyo yiví nuu kancha Jesús, ti ni ka jini nuu chaa ni jna'an tachi xaan un, ja ni nduva'a da. Ti ja ñu'un da sa'ma kancha da jiin Jesús, ti ni ka yu'u da.

16 Ti yiví ni ka jini nava ni jna'an chaa un. Suni nava ni kuu jiin kiní un, ni ka jani da jnu'un nuu yiví ni ka chakoyo un.

17 Ti tendí'i yiví un ni ka ka'an jiin Jesús ja na kuxio ya na ki'in ya ñuu i naa i.

18 Ti nu ni ndiví Jesús ini barco, kanda'u chaa ni jna'an tachi xaan un ja na ki'in da jiin ya.

19 Ko Jesús tu ni ja'a ya jnu'un, chi ni kachi ya:

—Kuanon ve'e ra ti kani ra jnu'un nuu taka jna'an ra, suni nuu amigo ra, nava ni chindee Yandios ro'o ja ni kunda'u ini ya maa ra —ni kachi ya.

20 Yukan ti kua'an chaa un, ti ni jani da jnu'un ni ñuu Decápolis nava ni sa'a Jesús jiin da. Ti taka yiví ni ka jiniso'o un, ni ka naa ini i.

Ën ña'an ni kue'e sa'ma Jesús jiin ja ni nadoto sesi'i Jairo

(Mt. 9.18-26; Lc. 8.40-56)

21 Nu ni najaa Jesús inga yu'u lago un, ni ka kututu tuku yiví kua'a nuu ya.

22 Yukan kande ya jiin da naa da. Ti ñn chaa kuña'nu ini ñn veñu'un Israel ja nani da Jairo, nu ni jini da Jesús, ni jakunjiti da nuu ya.

23 Ti ni kanda'u xaan da jiin ya:

—Kuni kuu se'e sí'i na. Ka'an nda'u na jiin favor na cho'o, ti chuxndee ni nda'a ni siki yí, na nduva'a i ti na kuchaku i —kachi da.

24 Ti kua'an Jesús jiin da. Ko kuankoyo kua'a xaan yívi jiin ya ja undi ka jaxin jna'an i.

25 Ma'ñu yívi un kua'an ñin ñasi'i jna'an kue'e niñi xaan tonto ja ni ndo'o ña jiin kue'e un uxi uu kuiya.

26 Ti ni xnaa ña taka ja ñava'a ña jiin kua'a chaa tajna ja kuni ña nduva'a ña, ko sa su'va vi'ga ni kuu ka'u ga ña.

27-28 Nu ni jiniso'o ña taka jniñu ña'nu sa'a Jesús, ti ni ndo'o ini ña:

—Nu na kundee ri kue'e ri vasu ti'li sa'ma ya ti va nduva'a ri —kachi ña.

Ja yukan kuu ja vaji ña jiin yívi un, ni tu'va ña ichi jata Jesús, ti ni ke'e ña sa'ma ya.

29 Ti yachi ni ni jini ña ja ni nduva'a ña, chi ni ichi ni niñi un maa ña.

30 Ko ni jini Jesús ja ni sa'a ya tajna ñin yívi jiin jniñu ndiso ya. Ni ndeokoto ya nuu yívi un ti ni jikajnu'un ya:

—¿Nau ja ni ke'e sa'ma ri? —kachi ya.

31 Ti ni ka kachi ndaja'a ya:

—¿Ndoo jikajnu'un ni nau ja ni ke'e sa'ma ni, ti jini ni ja yívi kua'a vaji jiin yo? —kachi da.

32 Ko ni nde'e va'a ya yayukan nuu nau ja ni ke'e sa'ma ya.

33 Ti ña'an ni ke'e sa'ma ya un, ni yu'u xaan ña chi jini ña ja ni nduva'a ña. Ni jakunjiti ña nuu ya ti ni kachi ña taka nundo'o ni jna'an ña.

34 Ti ni kachi Jesús jiin ña:

—Hija, ni nudva'a ra chi ni kandixia ra ru'u, ja kuu sa'a ri tajna maa ra. Koo sii ini, ti tukaa kondo'o ra kue'e un —ni kachi ya.

35 Ko ni ka'an ga ya sia'an jiin ña'an un, ja ni ka chakoyo yívi ka'iin ve'e Jairo, ti ni kachi jiin da:

—Ja ni ji'i sesi'i ni. Tukaa ndoo sa'a ni ja ki'in ni jiin maestro —kachi da.

³⁶ Ko ni jiniso'o ya ja sia'an ka ka'an da jiin Jairo. Ti tu ni ki'in ya jnu'un un, chi ni kachi ya:

—Koto yu'u ra. Kandixia ti ni kuu ni —kachi ya.

³⁷ Yukan ti kua'an ya jiin Jairo, ko tu ni ja'a ya jnu'un ja kinkoyo yivi kua'a un, chi nini Pedro, Santiago jiin Juan, chaa kuu ñani Santiago ni kuankoyo.

³⁸ Nu ni jaa ya ve'e chaa kuña'nu un ni jini ya ja ka nde'e xaan yivi ka'iin un, ja undi ka kanajiin ko'o i ti ka ndi'i ini i.

³⁹ Ni kivi Jesús ti ni kachi ya:

—Ndo xaan ka kuvaa ra ka nde'e ra ti suchi un tu ni ji'i yi, chi kixi yi —ni kachi ya.

⁴⁰ Ko so ni ka jaku yivi un ja sia'an ni ka'an ya, chi ni ka jini ja ni ji'i ndixia suchi un. Ko ni keni'in ya tendi'i kiti yivi un kuankoyo ichi fuera. Ti ni tu'va ya nuu katuu suchi un jiin tata i jiin nana i jiin ndaja'a ya.

⁴¹ Ni jni ya nda'a yi ti ni ka'an ya:

—Talita kumi, (kachi ya, ja kuni ka'an: ndoko, suchi lulu.)

⁴² Ti suchi un ja iyo uxi uu kuiya i, ni ndoko i ti ni jika i. Tata i, nana i jiin ndaja'a ya, so ni ka naa ini da, ti ka yu'u xaan da ja ni nandoto suchi lulu un.

⁴³ Yukan ti ni'in xaan ni ta'u ya jniñu ja koto kani kiti da jnu'un nuu ni ñn yivi ja sia'an ni kuu. Ti ni kachi ya:

—Kua'a staa na kaji yi —ni kachi ya.

*Najaa Jesús ñuu Nazaret
(Mt. 13.53-58; Lc. 4.16-30)*

6

¹ Yukan ti kuano'on Jesús ñuu Nazaret nuu ni ja'nu ya, ti kuankoyo ndaja'a ya suni.

² Ti ñin kivi ndetatu ni kivi ya ini veñu'un un, ti ni xna'an ya nuu yivi un. Kua'a xaan yivi ni ka ñuso'o jnu'un ni ka'an ya, ja so ni ka naa ini, ti ka ka'an:

—¿Nanu ni ni'in chaa ja'a jnu'un ka'an da un? ¿Nanu ni kutu'va da jniñu un ja undi jniñu ña'nu kuu sa'a da?

³ ¿Ti ansu ja'a kuu chaa ni tuji yujnu, se'e yi María, ja kuu ñani Jacobo, José, Judas, jiin Simón nu? Ti ja'a kanchuku kua'a da jiin yo naa yo —kachi naa.

Sia'an ni ka jini yivi un maa ya nanu ñin chaa ndeva'a ni. Ja yukan kuu ja tu ni ka nde'e nuu ya.

⁴ Ko ni kachi Jesús:

—Sava'a ni ga inga ñuu ka ja'a yivi ja yiñu'un nuu ñin profeta, ja ka'an jnu'un Yandios. Ti ansu maa yivi ñuu da, ni ñin jna'an da, ti ni familia ini ve'e da, tu kuenta'u i maa da —kachi ya.

⁵ Ti tu ni kuu sa'a ya kua'a jniñu ña'nu yukan. Chi jaku ni yivi ku'u ni sa'a ya tajna.

⁶ So ni kukui'ya ini ya, chi tu ni ka kandixia yivi un jniñu sa'a ya. Yukan ti kua'an ya ni jikonuu ya taka ñuu kuachi kendo yajni un, ni xna'an ya jnu'un Yandios.

Taji Jesús ndaja'a ya ja na ka'an da jnu'un Yandios

(Mt. 10.5-15; Lc. 9.1-6)

⁷ Yukan na, ti ni kana ya ndi uxi uu ndaja'a un. Ti ni ta'u ya jniñu nuu ndi uu ndi uu da, ti ni kachi ya:

—Kuankoyo naa ra ti ka'an ra jnu'un Yandios, ti kundiso ra jniñu ña'nu ja keni'in ra tachi xaan un kinkoyo.

⁸ Ko tundo kunda'a ra ja kuu ichi, ni ñunu staa, ni xu'un, chi ñini ñin yujnu xii kuu ja kituu ra —ni kachi ya.

⁹ Suni ni kachi ya ja na ki'i da ndijña nda'u, ti ñin ni sa'ma na ku'un da.

¹⁰ Ti ni kachi ya jiin da:

—Nu ni ka jakoyo ra ñin ve'e, kendo ra naa ra un, undi nu kuankoyo ra inga ñuu.

¹¹ Ti nu ni jakoyo ra ñin ñuu, ti nu tu ka chunso'o yivi un jnu'un ka ka'an ra, kisi tikacha ini ja'a ra, na kuu ñin seña ja ni ka kendo kui'ya i ja tu ni ka janta'u i ro'o naa ra, ti kuankoyo inga ñuu. Chi jandaa na kachi ri ja kivi na chaa juicio, ti vi'ga koo ndo'o yivi un nu tu kuanta'u i jnu'un ka'an ra, ti ansu ñuu Sodoma jiin Gomorra —ni kachi ya.

¹² Yukan ti kuankoyo ndaja'a ya, ni ka jikonuu da taka ñuu, ni ka xndaku da nuu yivi ja na nakani ini i nuu kuachi i naa i.

¹³ Tijni jinu ni ka keni'in da tachi xaan ka jna'an sava yivi. Suni ni ka sa'a da tajna tijni yivi ka ku'u, ja ni ka jaka da aceite olivo xini i, ti ni ka nduva'a i.

Ndo'o ini rey Herodes ja Juan, chaa skuanducha, kuu Jesús

(Mt. 14.1-12; Lc. 9.7-9)

¹⁴ Ni iyo ñin rey nani Herodes, ñin chaa ni yinda'a ni ñuu Galilea. Ti Herodes ni ni'in da jnu'un ja ni ñuu ka ka'an siki jniñu ña'nu xaan sa'a Jesús. Ti sava yivi un ka ka'an:

—Juan ja ni skuanducha un kuu, chi ni nandoto. Yukan kuu ja kuu sa'a jniñu ña'nu un —kachi.

¹⁵ Ti uu ga ka ka'an:

—Profeta Elías ja ni kii na jana'an un kuu da —kachi naa.

Ti sava ga yiví un ka ka'an:

—In profeta kuu, in ni kuu jiin chaa ni ka ka'an jnu'un Yandios na jana'an—kachi.

¹⁶ Ko ni kachi rey Herodes:

—Juan ja ni skuanducha un kuu. Ni nandoto vasu ni kenchara ri xini —kachi da.

Nava ni ka ja'ni da Juan, chaa skuanducha

¹⁷⁻²⁰ Rey Herodes ni jisonchara da Herodías, ñasi'i ñani da Felipe. Ti Juan ni kachi jiin Herodes ja tu va'a ja kuncha da jiin ñasi'i ñani da. Ti ña'an un ni kití xaan ini ña nuu Juan ja sia'an ni ka'an da, undi ni kundee ña ni ju'ni Herodes Juan jiin cadena, ti ni chondee da chaa vekaa, chi kuni ña ja na kuū da. Ko Herodes ni nama da Juan, chi jini da ja in chaa va'a kuu Juan. Jajna'an ini da jnu'un ka'an Juan, vasu tu chaku va'a ini da jnu'un.

²¹ Ti kuu nava ni ndo'o ini Herodías. Kiví ni kusii ini Herodes ni nasa'a da viko kiví ni kaku da. Ni ja'a da in ja kuxini nuu taka chaa ka kuña'nu jiin da jiin chaa ka kuu generál, suni jiin chaa ña'nu ñuu Galilea.

²² Ti ni kanchuku da ka kuxini da, ni kiví se'e si'i Herodías. Ni jitaja'a ña nuu kanchuku Herodes jiin taka chaa ka kuña'nu un. Ti Herodes jiin chaa ka kuña'nu un ni ka kusii ini da ja ni jitaja'a ña'an un. Ti ni kachi Herodes jiin ña:

—Kakan nuu ri sava'ni ga ndoo kuni ra, ti na kua'a ri —kachi da.

²³ Ni kachi Herodes ja siuku da kua'a da sava'ni ga ndoo na kakan ña, vasu sava ñuu nuu ta'u da jniñu.

²⁴ Ti ña'an un tu ni ka'an ña, ti ni kenda ña ni jikajnu'un ña nana ña, ti ni kachi ña:

—¿Ndoo kakan na nuu da? —kachi ña.

Ti ni kachi Herodías:

—Kakan xini Juan, chaa skuanducha un —kachi ña.

²⁵ Ni nandeokuñi ña'an lulu un, ti ni kachi ña jiin rey un:

—Vijna na ti kuni na ja na ta'u ni jniñu na kin ki'in da xini Juan, chaa skuanducha un. Na kii nuu na nuu ñin ko'o xita —kachi ña.

²⁶ Nu ni jiniso'o rey un ja sia'an ni ka'an ña, ni kukui'ya xaan ini da. Ko vanuxia ni ka jiniso'o chaa kanchuku jiin da un. Ti ni siuku da jnu'un ni ka'an da.

²⁷⁻²⁸ Ti ni taji da soldado ndito yuxe'e un kua'an da ini vekaa un. Ni kenchaa da xini Juan. Ti ni nandeokuñi da jiin xini da un nuu ñin ko'o xita. Ti Herodes ni nakua'a da nuu ña'an lulu un, ti ña'an lulu un ni nakua'a ña nuu nana ña.

²⁹ Nu ni ka jini chaa ka skua'a jiin Juan ja sia'an ni kuu, ni ka januki'in da yiki kuñu ndiyi un, ti ni ka chunduji da. Sia'an ni ka ja'ni da Juan, chaa skuanducha.

*Ni ja'a Jesús ja ni ka yaji u'un mil yivi
(Mt. 14.13-21; Lc. 9.10-17; Jn. 6.1-14)*

³⁰ Nu ni ka nchakoyo ndaja'a un, ti ni ka jani da jnu'un taka jniñu ni ka sa'a da jiin ja ni ka xna'an da.

³¹ Ti kivi un kua'an vaji yivi kua'a nuu kancha Jesús, ja tu ni kuu kaji da staa naa da. Ti ni kachi ya:

—Na cho'o naa yo undi nuu kuu ndetatu ra naa ra tili —kachi ya.

³² Ni ka kivi da nuu in barco, ti ni ka jika da kua'a da naa da nuu iyo va'a, nuu ni ka'in maa da naa da.

³³ Ko sava yivi ni ka jini nuu ni kee barco un kua'an, ni ka nakuni. Ti ni ka kututu kua'a xaan yivi taka ñuu kendo yajni un. Ni ka jika i ni yu'u mar un, ti xnakan i ni ka jakoyo, sa ni jaa barco un jiin Jesús.

³⁴ Nu ni kee ya ini barco un, ni jini ya ja ka'in kua'a xaan yivi. Ti ni kunda'u xaan ini ya maa i. Chi ka'in yi nanu ri tu jito'o. Ti yukan ni kundee ya nchaka ni xndaku ya jnu'un Yandios nuu i.

³⁵ Nu kuan ini, ti ni ka kachi ndaja'a ya:

—Ja kuan ki'vi ti ja'a tundo iyo.

³⁶ Na taji ni taka yivi ja'a na nukoyo i taka ranchu jiin taka ñuu kendo yajni ja'a, ti na kuaan i staa kuxini i —kachi da naa da.

³⁷ Ko ni kachi Jesús:

—Kua'a maa ra naa ra staa na kee i —kachi ya.

Ti ni ka kachi tuku ndaja'a un:

—Sa'a yo jniñu in kuiya sa ni'in yo xu'un ja kuaan kua'a yo staa stila ja kuu yivi ja'a. ¿Kuni ni ja xnaa yo xu'un nu? —kachi da.

³⁸ Ti ni kachi tuku ya:

—Kuande'e naa ra nasa staa stila ka ñava'a yivi ja'a—kachi ya.

Ka jande'e da, ti ni ka nandeokuñi da nuu ya:

—Iyo u'un staa stila jiin uu chāká —ni ka kachi da.

³⁹ Ti ni kachi ya jiin ndaja'a ya:

—Kachi jini yiví ja na nukoo yukun i nuu icha un —kachi ya.

⁴⁰ Ti ni ka nukoo i uu xiko uxi xi ñn ciento i ñn ñn yukun.

⁴¹ Yukan ti ni ki'in Jesús ndi u'un staa stila un jiin uu chāká un. Ni ndakoto ya andiví. Ni nakuanta'u ya nuu Yandios. Ti ni ki'in ya ndi u'un staa stila un, ni sakuachi ya, ni ja'a ya nuu ndaja'a ya ja na tejna'an da nuu yiví un naa i. Suni ni sakuachi ya ndi uu chāká un, ti ni tejna'an ya nuu yiví un ja na kaji i.

⁴² Tendí'i yiví un ni ka yaji i nasa ni kundee maa i.

⁴³ Nu ni ndi'i ni ka yee i staa, ni ka nastutu ndaja'a ya un uxi uu chika staa stila jiin chāká un ja ni kendoso kua'a ga.

⁴⁴ Ti chaa ni ka yee staa stila un ni ka iyo u'un mil.

*Jika Jesús nuu nducha lago
(Mt. 14.22-27; Jn. 6.16-21)*

⁴⁵ Nu ni ndi'i ni ka nastutu ndaja'a ya ja ni kendoso un, ti ni kachi ya jiin da ja na kiví da barco, ti na kinkoyo da inga yu'u lago un undi ñuu Betsaida, nuu ni kendo ya ni kanxia'u ya jiin yiví un kuankoyo i.

⁴⁶ Yukan ti kua'an ya undi yuku un ja na kakanta'u ya.

⁴⁷ Nu kuan ki'ví, ti barco un ja kua'an undi ma'ñu lago un. Ti Jesús kande maa ñn ya undi nuu ñu'un ichi.

48 Nu ni kuu kaa uni jaña'an, ni jini ya ja ka jna'an da nundo'o ja skaka da barco un, chi kee xaan tonto tachi ichi sajni. Yukan ti kua'an Jesús jika ya nuu nducha lago un undi nuu ka'iin da naa da. Ti ni ndo'o ini ya ja ya'a ndoo ya ki'in ya niku.

49 Ko nu ni ka jini da ja jika ya kuaja ya nuu nducha un, ni ka ndo'o ini da ja ñn ni'na kuu, ti ni ka yu'u xaan da undi ka kanajiin da.

50 Tendi'i da ka yu'u xaan, ko ni ka'an ya:

—Maa ri kuu, koto yu'u ra naa ra —kachi ya.

51 Ni ndivi ya nuu barco un, ti ni kuu na'in tachi un. So ka naa ini da ni ka nde'e da nuu ya.

52 Vasu ka jini da jniñu sa'a ya, ko tu ni ka chaku ini da ja jika ya nuu nducha un, ti ni jakuñi tachi un, chi changa ga kandixia va'a da naa da.

*Sa'a Jesús tajna yivi ka ku'u ñuu Genesaret
(Mt. 14.34-36)*

53 Nu ni ka kendajiyo da yu'u lago un, ni ka jakoyo da ñuu Genesaret. Yukan ni ka kuun da, ti ni ka ju'ni da barco da.

54 Ti yivi ka'iin un ni ka nakuni i Jesús.

55-56 Ti ni ka ja'a i corri, ni ka kaxnu'uni nuu ni yivi ñuu, taka ranchu jiin taka ñuu kuachi kendo yajni un, ja na kunda'a i taka yivi ka ku'u nuu ya. Ti sava'ni ga ñuu nuu ya'a ya, yukan ka skatuu da yivi ka ku'u yu'u ichi un, ja na sa'a ya tajna i. Ti ka kanda'u i jiin ya, ja na kua'a ya vasu ti'li yu'u sa'ma ya na jni i, ti na nduva'a i naa i. Ti taka yivi ni ka kue'e sa'ma ya, ni ka nduva'a i.

*Yivi ka ka'an ndeva'a siki jnu'un Yandios
(Mt. 15.1-20)*

7

¹ Hín kivi ni katu'va chaa fariseo jiin chaa ka xna'an ley ini veñu'un Israel, ja vekoyo da ichi Jerusalén nuu Jesús.

²⁻⁵ Ja ni ka jini da ja ndaja'a ya tu ni ka nanda'a da ti ka yee da staa, ja tu ka siuku da jnu'un chaa un naa da. Chi chaa fariseo jiin chaa Israel ka siin da jiin jnu'un jana'an, ja nini ka nanda'a da tijní jinu ti sa kaji da staa, suni nu ni ka ja'an da ya'u. Chi ka ndo'o ini da ja nu na sa'a da sia'an, ti ka kendo va'a da nuu Yandios. Suni sia'an ka sa'a da jiin taka ndajniñu, ka nakacha da taza, ko'o, tindo'o, kisi, suni jito da. Ti nu ni ka jini da ja ndaja'a Jesús tu ka siuku da jiin jnu'un un, ti ni ka kachi da jiin Jesús:

—¿Ndoo tu ka nanda'a ndaja'a ra nava iyo jnu'un jana'an? —kachi da.

⁶ Ti ni kachi Jesús:

—Jandaa ni chaa profeta Isaías na jana'an, ja jiin jnu'un ra un ka stuu ra maa ra ja tu ka chiñu'un ra jnu'un Yandios, na ni kachi da:

Ko yivi ja'a, so jiin yu'u i ka chiñu'un i ru'u, ko añu i, chi jika kuu ini i jito i ru'u.

⁷ Ti so ka xnda'u i ja ka kandixia ndaa i jnu'un Yandios, chi ka siin i jiin jnu'un maa i.

Ti ka ka'an i ja ñn ni kuu jiin jnu'un Yandios. Ni kachi Yandios ja ni chaa Isaías.

⁸⁻⁹ Suni sia'an ka kuu ra, chi ro'o ni ka xndoo ra ley Yandios ja siin ra jiin jnu'un ka ndo'o ini maa ra naa ra, ja ni'in ini ra naa ra. Chi ka xndoña'an ra jiin jnu'un un, ti ka chaa xio ra ley Yandios.

¹⁰ Ja yukan ni kachi Moisés: “Kuandatu nuu tata ra nuu nana ra”, ti “Nu nau ja na ka'an ndeva'a nuu tata nuu nana, ti va'a ga na kuū”, kachi da.

¹¹ Ko ro'o naa ra, ka ka'an ra ja tu kuu chindee ra tata ra nana ra. Chi ka ka'an ra: “Ni jito na ni'in ni kuu, ko vijna tukaa, chi taka ja ñava'a na ja ni soko na nuu Yandios.”

¹² Ti tu ñn yivi na ka'an sia'an, yukan ti ka'an ra jandaa ja tukaa koto i nuu tata i ni nana i.

¹³ Yukan kuu ja ka siuku ra sava'ni ga jnu'un ka jajna'an ini maa ra, undi ja ka kuña'nu ga ra ja kuu maa jniñu ta'u Yandios —ni kachi Jesús.

Tu naa kuachi ndeyu yaji yo

¹⁴ Yukan ti kana tuku ya yivi un, ti ni kachi ya:

—Chunso'o va'a naa ra.

¹⁵⁻¹⁶ Nchakuachi ñn chaa, ko ansu jiin ja kivi yu'u da, chi su'va jiin ja kaña yu'u da ja ka'an da un. Yukan kuu ja sa'a ja nchakuachi da —kachi ya.

¹⁷ Ni xndoo ya yivi kua'a un, ti ni ndivi ya ini ve'e. Ti ndaja'a ya ni ka jikajnu'un da nasa kuni ka'an jnu'un ni ka'an ya nuu yivi un.

¹⁸ Ti ni kachi Jesús:

—¿Vanu ñn ni kanda ra jiin yivi un naa i, ja tu ni ka chaku ini ra jnu'un ka'an ri nusa? Ni ñn yivi tu nchakuachi i nuu sava'ni ga ndeyu yaji i.

¹⁹ Chi ja yaji i tu kivi ini añu i ja ndo'o ndeva'a ini i, chi kua'an chii jiti i —kachi ya.

Sia'an ni kachi ndaa Jesús ja iyo ndoo taka nuu ndeyu yaji yo.

²⁰⁻²¹ Siin Jesús ka'an ya, ti ni kachi ya:

—Nchakuachi ñn chaa ndo'o ndeva'a ini añu da ti sa'a ndeva'a da, chi taka jnu'un ndeva'a un kaña undi ini añu da. Yukan sa'a ja ka ndo'o ndeva'a ini

yiví, ti tu kuu na'iin ini i jiin. Kuni sakui'na i, ji'yo i ka'ni i ndiyí,

²² kuni kuisonchaa i ndajniñu ñanijna'an i kua-sun ini i, ja'a ini i, xndoña'an i, sa'a i jniñu ja chakuachi i inga yiví, ndo'o vixi ini i, tu ka'an yiñu'un i, jika i siki vicio, chaa un ka xnda'u da ñasi'i ja ka yisikincha jna'an da, ti ndo'o kue'e ini da siki sava'ni ga yiví ja ji'yo da kusu da jiin.

²³ Ti taka yukan vaji undi ini añu da, ti sa'a ja nchakuachi xaan da jiin —kachi ya.

*Ën ña'an Sirofenicia kanda'u ña jiin Jesús
(Mt. 15.21-28)*

²⁴ Yukan ti kua'an Jesús undi ñuu Tiro jiin Sidón. Ni ni'in ya ñn ve'e ni kendo ya. Ti tu kuni ya ja kuni yiví nuu kancha ya yukan, ko tu ni kuu kisa'yi ya.

²⁵ Ti ñuu un iyo ñn ña'an lulu ja jna'an tachi xaan. Ti nu ni jiniso'o nana ña jnu'un Jesús, ni ja'an ña nuu kancha ya ti ni jakunjiti ña nuu ya.

²⁶ Ti ansu ña'an ñuu Israel kuu ña, chi ña'an ñuu Sirofenicia kuu ña, chi yukan ni kaku ña. Ti jikanta'u ña nuu Jesús ja na kenchaa ya tachi xaan jna'an ñn se'e si'i ña.

²⁷ Ko ni kachi Jesús jiin ña:

—Sia, xnakan na sa'a ri jniñu nuu chaa ñuu ri, ti sa na sa'a ri jniñu kuni ra. Chi tu kuu ja kuisonchaa yo staa yu'u suchi kuachi nu ka yee i, ti kua'a yo nuu ina un —kachi ya.

²⁸ Ti ña'an un ni kachi ña:

—Jandaa ka'an ni Jito'yo, ko ina un chi ka'iin ti chii mesa, ti nastutu ti staa nukoyo yu'u suchi kuachi un —kachi ña.

²⁹ Ti ni kachi Jesús:

—Ni kachi ndaa ra chi ni kandixia ra ru'u. Vijna ti kuano'on ve'e ra, chi tachi xaan un ja ni kenchara nuu sesi'i ra —kachi ya.

³⁰ Yukan ti kuano'on ña. Ni najaa ña ti ni nde'e ña ja ndetatu sesi'i ña un nukoo nuu jito, ti ja ni nduva'a.

Ni sa'a Jesús tajna tijní nuu yívi ka ku'u

³¹ Jaku ni kivi ti ni kee ya ñuu Tiro, ti kua'an ya. Ni ya'a ya ichi ñuu Sidón jiiñ ñuu Decápolis ti ni najaa ya undi yu'u lago Galilea.

³² Yívi ñuu Decápolis un, ni ka kinchaka ñin chaa so'ó, ti ni ka jikanta'u da nuu Jesús ja na chuxndee ya nda'a ya siki chaa un ti na nduva'a da.

³³ Ti Jesús ni kana ya chaa so'ó un. Ti ni chundee ya xini nda'a ya ini so'o da. Ni tiví sí'i ya xini nda'a ya. Ti ni kue'e ya yaá da.

³⁴ Ni ndakoto ya ichi andívi, ti ni jakan ini ya ja kukui'ya ini ya, ti ni kachi ya:

—Efata (ja kuni ka'an: Nuña) —kachi ya.

³⁵ Ti hora un ni jiniso'o ni chaa un, ti ni kuu ka'an va'a da.

³⁶ Ti ni kachi Jesús jiiñ yívi un ja tu kani kuiti i jnu'un ja ni sa'a ya jniñu ña'nu un. Ko vasu sia'an ni kachi ya, ko vi'ga ni ka jani yívi un jnu'un.

³⁷ Ti taka yívi ni ka jiniso'o un, ni ka naa ini i, ti ni ka kachi i:

—Taka jniñu sa'a da iyo va'a. Chi nduva'a chaa so'ó jiiñ chaa ñi'in un sa'a da —kachi naa.

*Ni skaji Jesús vi'i ga kuun mil yívi
(Mt. 15.32-39)*

8

¹ Kiví un ni ka taka tuku kua'a xaan yívi nuu ya, ko tu ka ndiso i staa kaji i. Yukan ti ni kachi ya jiiin ndaja'a ya:

² —Kunda'u ini ri yívi kua'a ja'a, chi ja ni kuu uni kiví ka'iin yívi ja'a jiiin ri, ti tukaa ndoo kaji yi.

³ Nu na nataji ri yívi ja'a nukoyo ndicha i, ti va kuita i sava ichi un, chi iyo yívi vekoyo jika —kachi ya.

⁴ Ti ni ka kachi ndaja'a ya un:

—¿Nanu kii ja kua'a yo nuu yívi ja'a, ti ja'a tu kanchuku ni iin yívi? —kachi da.

⁵ Ti ni jikajnu'un ya da:

—¿Nasa ga staa stila kandiso ra nusa?

Ti ni ka kachi da:

—Kandiso na uxia staa stila —kachi da.

⁶ Nusa, ti ka'an jiiin yívi na nukoo i naa i —kachi ya jiiin da.

Ti ni ki'in ya ndi uxia staa stila un, ni nakuanta'u ya nuu Yandios, ni sakuachi ya, ti ni ja'a ya nuu ndaja'a ya un, ja na tejna'an da naa da nuu yívi naa i.

⁷ Suni iyo jaku ga chāká kuachi. Ni ki'in ya ti ni nakuanta'u ya nuu Yandios ja kuu chāká un. Ti suni ni ja'a ya nuu ndaja'a ya ja na tejna'an da nuu yívi un.

⁸⁻⁹ Kiví un ni ka iyo kuun mil yívi, ti tendi'i i ni ka yee i nava kuu ini maa i. Ti ni kendoso uxia ga chika na'nu staa stila ja ni ka nastutu ndaja'a ya. Yukan na ti ni nataji ya, ti kuan nukoyo i.

¹⁰ Ni ndivi ya ini barco jiiin ndaja'a ya, ti kua'an ya ichi ñuu Dalmanuta.

Ka'an chaa fariseo jiin Jesús ja na sa'a ya #n jniñu ña'nu

(Mt. 12.38-40; 16.1-4; Lc. 11.29-30; 12.54-56)

¹¹ Nu ni jaa barco un, ti ni ka chakoyo chaa fariseo ni ka jande'e da Jesús, ti ni ka keja'a ka xndichi da ya, ja kuni kotonchaa da ya. Ni ka ka'an da jiin ya ja na sa'a ya #n jniñu ña'nu, nava na kuni ndaa da ja maa Yandios ni taji Jesús.

¹² U'u ni jitu ini ya, ti ni kachi ya:

—¿Ndoo ka jani ini ra ja sa'a ri jniñu ña'nu nuu ra naa ra, ti sa kandixia ra ja Yandios ni taji ru'u nusa? Ko nuu ra naa ra tu sa'a ri ni #n jniñu ña'nu —ni kachi ya.

¹³ Ni xndoo ya da naa da, ti ni ndivi ya nuu barco jiin ndaja'a ya. Ti kua'an ya inga yu'u lago un.

Xndaku Jesús ja kotonchaa nda'a ya jiin jnu'un ka ka'an chaa fariseo jiin jnu'un rey Herodes

(Mt. 16.5-12)

¹⁴ Ni ka naa ini ndaja'a ya ja kunda'a da staa stila, chi #n ni ga staa stila ka yinda'a da. Ti nu kuankoyo da nuu barco un, ti ni kachi Jesús:

¹⁵ —Koto ra naa ra jiin jnu'un ka ka'an chaa fariseo jiin jnu'un ka'an rey Herodes, chi yachi kuan kuichanuu jnu'un un nuu ni ñuu, nanu yachi keni'no levadura chii yujña kuu staa stila —kachi ya.

¹⁶ Ti ndaja'a ya ni ka keja'a ka ndajnu'un da naa da ndoo ni ka'an ya sia'an:

—¿Xi ja tu ka yinda'a yo staa stila kuu ja ka'an ya sia'an nu? —kachi da.

¹⁷ Ni jini Jesús ja tu ni ka chaku ini da siki jnu'un ka'an ya, ti ni kachi ya jiin da:

—¿Ndoo ka ka'an ra ja tu ka ndiso ra staa stila? Tu ni ka chaku ini ra nusa. Xaan ga ndava ini ra ja tu ka chaku ini ra.

¹⁸ ¿Ka nde'e ra jiin nduchi ra taka jniñu sa'a ri, ti ka ñuso'o ra taka jnu'un ka'an ri, ti tu ja'i chaku ini ra nu?

¹⁹ ¿Tu ka na'an ra kivi na ni tejna'an ri u'un staa stila nuu u'un mil yivi un naa i nusa? ¿Ti nasa staa stila ni ka nastutu ra ja ni kendoso nusa? —kachi ya.

—Ni ka nastutu na uxi uu chika staa stila —kachi da naa da.

²⁰ —Ti suni na ni tejna'an ri uxia staa stila nuu kuun mil yivi un, ¿nasa chika na'nu ni ka nastutu ra un nusa? —kachi ya.

—Uxia chika na'nu ni ka nastutu na —kachi da naa da.

²¹ —¿Ti ndoo tu ka chaku ini ra nusa? —kachi ya.

Sa'a Jesús tajna ñin chaa ñuu Betsaida

²² Nu ni jaa ya ñuu Betsaida, sava yivi ni ka yinda'a ñin chaa kuáa nuu Jesús. Ti ni ka ka'an da jiin ya ja na sa'a ya tajna chaa kuáa un.

²³ Ni jniñ ya nda'a chaa un, ti kua'an ya jiin da yu'u ñuu un. Ti yukan ni jaka ya ti'li tisi'i ya nduchi da. Ni chuxndee ya nda'a ya siki da, ti ni jikajnu'un ya da:

—¿Ja kuu nde'e ra ti'li, xi tuu nu? —kachi ya.

²⁴ Ti chaa un ni nde'e da, ti ni kachi da:

—Jini na yivi, ko na kanda yujnu kanda ti ka jika kuankoyo —kachi da.

²⁵ Ni chaa tuku ya nda'a ya nduchi da, yukan ti sa ti ni kuu nande'e va'a da.

²⁶ Ti ni kachi ya jiin da:

—Kuano'on ve'e ra, ko tukaa ki'in ra ichi ñuu. Ti koto kani ra jnu'un nuu ni ñn yiví un —kachi ya.

Kachi ndaa Pedro ja Jesús kuu Cristo
(Mt. 16.13-20; Lc. 9.18-21)

²⁷ Yukan ti kua'an Jesús jiin ndaja'a ya ñuu Cesearea, ñn ndañuu Filipino. Ti ichi kuankoyo da ni jikajnu'un ya nuu da naa da:

—¿Ndoo ka ndo'o ini yiví ja naa chaa kuu ri?
—kachi ya.

²⁸ Ti ni ka kachi da:

—Ka ka'an i ja kuu ni Juan, chaa ni skuanducha. Sava i ka ka'an ja kuu ni Elías, chaa ni ka'an jnu'un Yandios undi na jana'an. Ti sava ga i ka ka'an ja kuu ni inga profeta na jana'an—kachi da naa da.

²⁹ —Ti maa ra, ¿nasa ka ndo'o ini ra nusa?
—kachi ya.

Ti ni kachi Pedro:

—Maa ni kuu Cristo, ja ni taji Yandios ja ndiso jniñu ña'nu —kachi da jiin ya.

³⁰ —Maa ri kuu, ko koto kani ra jnu'un naa ra nuu ni ñn yiví —kachi ya.

Ka'an Jesús ja ka'ni yiví ya ko nandoto ya
(Mt. 16.21-28; Lc. 9.22-27)

³¹ Yukan ni kachi ya jiin ndaja'a ya:

—Ru'u ja kuu ri maa Se'e Yiví Ñuyiví, koo ndo'o koo nene ri. Chi taka chaa ka kuña'anu nación Israel, jiin taka sutu kuña'nu, jiin suni chaa ka xna'an ley ini veñu'un un, tu kuajnu'un da ru'u. Chi ka'ni da ru'u, ko nu uni kivi ti nandoto ri —kachi ya.

³² Ni kachi kaji ya ja sia'an kondo'o ya. Ti Pedro ni kachi da jiin ya ja koto kua'a ya jnu'un ja koo yukan.

³³ Ko Jesús ni nandeokuñi ya nuu uu ga ndaja'a ya un, ti ni ka'an ya nuu Pedro:

—Kuxio ki'in ra, chi xndaku ra nanu xndaku ja'u'u. Chi so ja sakanuu ini ri kuu ro'o, chi tu ndo'o ini ra ja kin siuku ri nava kuni maa Yandios, chi ro'o ndo'o ini ra nava ka ndo'o ini yivi ñuyivi ja'a —kachi ya.

Nau ja kuni siin jiin jnu'un Yandios

³⁴ Yukan ti ni kana ya ndaja'a ya jiin yivi kua'a un, ti ni kachi ya jiin i:

—Nu nau ja kuni siin jiin ri siki jnu'un Yandios ja ka'an ri, ti na xndoo i taka ja ndo'o ini i, ti na tava ini i ja taka kivi na koo ndo'o koo nene vasu na kuu i ja siki ru'u.

³⁵ Chi yivi kandio ini ja kunchuku va'a i nuu ñuyivi ja'a, ja tu kandixia i jnu'un ri, ti xnaa i maa i. Ko yivi na kondo'o koo nene i ja na kandixia i ru'u jiin ja ka'an i jnu'un ri, ti yivi un na kunchuku i nuu andivi ja kuu saa ni.

³⁶ Jandaa na kachi ri ja tundo ni'in yivi ja ka ndiyo ini i ni'in yi taka ja iyo nuu ñuyivi ja'a, ti xnaa i maa i, ja tu kuncha i jiin Yandios nuu andivi.

³⁷ Jandaa na nachi ri ja tu iyo kuiti naa jiin chunaa yivi un ja nama i aña i.

³⁸ Ko nu ñn yivi kukanuu i ja siki ru'u, ja tu kuni ka'an i nuu yivi ja kandixia i ru'u, vasu nuu yivi ka yisikincha jnu'un ri, nusa ti ru'u, maa Se'e Yivi Ñuyivi, suni kukanuu ri ndakuni'in ri sivi i kivi na nchaa ri jiin taka ángel ja ka junukuachi nuu

Yandios. Chi ja kuu kiví un kundiso ri jniñu ña'nu ja tatu Tata ri Yandios nuu ri naa ri. Yukan ti tu nakuni kuiti ri taka yivi ja tu ni kuni ka'an i ja kandixia i ru'u —ni kachi Jesús.

9

¹ Yukan ti ni kachi Jesús:

—Jandaa na kachi ri ja sava ro'o ja ka'iin ja'a kuchaku ra ti kuni ra nchaa Se'e Yandios jiin jniñu ña'nu xaan ga, ti ta'u ya jniñu —ni kachi ya.

*Ni nasama Yandios nuu Jesús
(Mt. 17.1-13; Lc. 9.28-36)*

² Nu ni kuu iñu kiví ti ni kana ya Pedro, Jacobo jiin Juan, ti kua'an ya jiin da yuku sukun ga un nuu ni ku'iin da naa da. Ti Jesús ni nasama nuu ya.

³ Sa'ma ya ndincha ii. Ti ni ndukiyi xaan tonto ja ni ñn yivi ñuyivi ja'a tu nakacha sia'an.

⁴ Ti yukan ni ka jini da ja ni ka ndenda uu chaa ni ka kuu profeta na jana'an Elías jiin Moisés, ja ni kuu da ñn chaa kuña'nu ga nuu nación Israel, ka ndajnu'un da jiin Jesús.

⁵ Ti ni kachi Pedro:

—Maestro, va'a ga na kendo yo ja'a. Na sa'a na ve'e kuii na kunchaa yo. ñn kuu maa ni, ñnga na kuu Moisés, ti ñnga na kuu Elías —kachi da jiin Jesús.

⁶ Sia'an ni ka'an Pedro, chi so ni ka sa'u ini da naa da ja ka yu'u da, ti tu ni jini da nau kuu jnu'un ka'an da.

⁷ Yukan ni jakava ñn viko nu'un siki da naa da, ti nuu viko un ni ka jiniso'o da ñn ndusu ja ni ka'an:

—Ja'a kuu Se'e ri ja kunda'u ini ri. Chunso'o ti kuandatu ra naa ra jnu'un ka'an ya —kachi.

⁸ Ti nu ni ka nde'e da un, tukaa ndoo iyo Moisés jiin Elías, chi maa ni ga Jesús ni ka jini da.

⁹ Nu ni ka nandeokuñi da xini yuku un, ti ichi ka no'on da ni kachi Jesús ja tu kani kuiti da jniñu naa da ndoo ni ka jini da, chi undi nu ni nandoto ya ja kuu ya maa Se'e Yivi Ñuyivi.

¹⁰ Yukan ti tu ni ka jani kuiti da jnu'un nuu ni ñn yivi, chi so ka ñu'un ini maa da nasa kuu ja kuū ya, ti nandoto ya.

¹¹ Ni siin da kuankoyo da ti sa ni ka jikajnu'un da Jesús:

—¿Ndoo ka ka'an chaa ka xna'an ley ini veñu'un un ja xnakan ndii tuku profeta Elías, ti sa kii Cristo nusa? —kachi da.

¹² Ti ni kachi ya jiin da:

—Jandaa kuu ja xnakan Elías ndii tuku, ti satu'va da yivi jiin tendi'i ja iyo ini ñuyivi ja'a, chi sia'an ka'an nuu tutu ii. Nu sia'an kuu, ¿ti ndoo ka'an ga nuu tutu un ja koo ndo'o koo nene maa Se'e Yivi Ñuyivi, ti skexiko yivi maa ya, ti koto u'u i nuu ya nu?

¹³ Ko na kachi ri ja Elías, chi ja ni kii da, ko ni ka sa'a ndeva'a yivi nava kuu ini jiin da. Yukan ni kundaa nava yoso nuu tutu ii ja sia'an kuu —kachi ya.

Ni nduva'a ñn chaa lulu ji'i yi'i
(Mt. 17.14-21; Lc. 9.37-43)

¹⁴ Yukan ti ni najaa ya nuu ka'iin uu ga ndaja'a ya, ni jini ya ka'iin kua'a xaan yivi nuu da, ti suni ka'iin chaa ka xna'an ley un, ti ka ka'an nchaa jna'an chaa un jiin ndaja'a ya.

15 Nu ni ka jini yiví un ja ni najaa Jesús, so ni ka naa ini i ka nde'e i nuu ya. Ti ni ka ja'a i corri kuan kanxia'u jiin ya.

16 Yukan na ti ni jikajnu'un ya ndaja'a ya:

—¿Ndoo ka kijna'an ra jiin chaa un naa da?
—kachi ya.

17 Ti ñin chaa ni kachi:

—Maestro, yinda'a na ñin se'e na nuu ni ja ndo'o i tachi xaan, ti undi kuu ñi'in i sa'a.

18 Nu ni ndeja'a kue'e un, undi jiyí'i i ti jiokava i nuu ñu'un, ti kaña ti'iñu yu'u i. Suni ku'yu jnu'un i, ti undi kuu tikuku i. Ni kachi na jiin ndaja'a ni ja na kenchaa da tachi xaan un ki'in, ko tu ni kujnuni ja sa'a da naa da.

19 Yukan ti ni kachi ya jiin ndaja'a ya:

—Xaan ni'in ini ra naa ra. Nasa ga kivi ti sa kandixia ra nusa. Ti ja ni kuna'an ja ndo'o nene ri jiin ra naa ra. Kuan ki'in chaa lulu un na kii da
—kachi ya.

20 Ti ni ka janki'in da chaa lulu un. Ni jini tachi xaan un nuu Jesús, ti luego ni, ni sa'a ja na kuyí'i chaa lulu un. Ni nduva i nuu ñu'un, ni keja'a jiokava i, ti kaña ti'iñu yu'u i.

21 Ti ni jikajnu'un ya maa tata i:

—¿Nasa kuiya ni kuu ja jna'an i tachi xaan ja'a?
—kachi ya.

Ti ni kachi tata i:

—Undi lulu i.

22 Ti tijni jinu kuni ka'ni tachi xaan un yi. Iyo nduva i nuu ñu'un. Iyo kanakava i ini nducha. Ti nu kuu chindee ni saña, kunda'u ini ni nuu na jiin se'e na, ti sa'a ni tajna i —kachi da.

23 Ti ni kachi Jesús jiin da:

—Koto ka'an ra sia'an, chi jandaa kuu ja sa'a ri jniñu ña'nu un nu na kandixia ra —kachi ya.

²⁴ Ti tata suchi lulu un ni ka'an jaa da:

—¿Kandixia na, ko chindee ni saña nava na kandixia ndaa ga na! —kachi da.

²⁵ Nu ni jini Jesús ja kuan kututu ga yiví naa i, ti ni kachi ya jiin tachi xaan un:

—Ro'o tachi xaan, ja sa'a ñi'in ra, ti sa'a so'o ra chaa lulu ja'a, kuankee ti koto xñaña'an ga ra nuu i —kachi ya.

²⁶ Ti tachi xaan un ni kisi chaa lulu un, ni sa'a ja na kuyi'i tuku da, ni kanajiin, ti ni kenda kua'an. Ti suchi un undi ni ji'i naa i katuu i. Ni ka ndo'o ini sava yiví un ja ja ni ji'i yi.

²⁷ Ko Jesús ni jni ya nda'a i, ni ndokani ya i, ti ni ndokuiñi i kandichi i.

²⁸ Nu ni ka najaa da ve'e, ni ka jikajnu'un ndaja'a un ya:

—¿Ndoo tu ni kuu kenchaa na tachi xaan un ki'in naa na? —kachi da.

²⁹ Ti ni kachi Jesús:

—Ja keni'in yo ñin tachi xaan sia'an, ti kuni ja na kakanta'u ni ini ni añu yo nuu Yandios. Chi tu kuu sa'a yo nu tu kuñukuu ini yo ja maa Yandios kuu ya sa'a jniñu un —kachi ya.

*Ka'an tuku Jesús ja kuū ya ko nandoto ya
(Mt. 17.22-23; Lc. 9.43-45)*

³⁰⁻³¹ Yukan na ti kua'an ya jiin ndaja'a ya inga ichi, ni ka ya'a da ñuu Galilea. Ko kuankoyo xe'e da jiin ya, chi kuni xndaku ya ñin jnu'un kanuu ga ñini nuu maa da naa da, ti tu kuni ya ja kuni yiví nanu kancha ya. Yukan ti ni kachi ya nuu da:

—Maa Se'e Yiví Ñuyiví, nakua'a yiví maa ya nuu chaa kanda kua'an kanda vaji un, ti ka'ni da maa ya. Ko nuu uni kivi ti nandoto ya —ni kachi ya.

³² Ko tu ni ka chaku ini ndaja'a ya un jnu'un ni ka'an ya, ti ni ka yu'u da kajnu'un da ya.

*Xna'an Jesús nau kuu chaa kuña'nu ga
(Mt. 18.1-5; Lc. 9.46-48)*

³³ Ti nu ni ka jaa da ñuu Capernaum, ni ka kivi da ñn ve'e, ti ni jikajnu'un ya nuu ndaja'a ya:

—¿Ndoo ka ka'an ra ichi vaji yo? —kachi ya.

³⁴ Ti maa da tu ni ka ka'an kuíti da, chi ichi un ka ndajnu'un da sia'an:

—¿Nau ñn ñn yo kuña'nu ga nusa? —ni ka kachi da.

³⁵ Yukan ti ni nukoo Jesús, ni kana ya ndi uxi uu ndaja'a un, ti ni kachi ya:

—Nu nau ja kuni kunúú, ti kuni kuña'nu, va'a ga na kendo sandi'i ni ga, ti na kunukuachi nuu uu ga da un —kachi ya.

³⁶⁻³⁷ Ti ni jni ya ñn suchi lulu, ti ni jununchaa ya i, ti ni kachi ya jiin ndaja'a ya:

—Jiin jniñu ndiso ri na kachi ri ja nu na kunda'u ini ra ñn suchi lulu sia'an, ti ja ni kuu ra ñn yiví ni janta'u ru'u. Ti ja janta'u ra ru'u, ansu nini ru'u janta'u ra, chi suni janta'u ra Yandios, ya ni taji ru'u vaji ri —kachi ya.

*Jesús ka'an ya jiin ndaja'a ya ja na kuenta'u da
yiví sa'a jniñu ña'nu jiin sivi ya
(Lc. 9.49-50; Mt. 10.42)*

³⁸ Yukan ti ni kachi Juan:

—Maestro, ni ka jini na ñn chaa ja jiin sivi ni keni'in da tachi xaan ka jna'an sava yiví. Ti ni ka

kachi na jiin da ja tu sa'a da jniñu un, chi tu yaku da jiin yo —kachi da.

³⁹ Ti ni kachi Jesús:

—Tu ka'an ra nuu da niku, chi chaa ndaku ni'in sivi ri ja sa'a da ñin jniñu ña'nu nanu sa'a ri ka'an va'a da ti tu ka'an da siki ri.

⁴⁰ Chi yivi tu ka'an siki yo ja chindee i yo'o, su'va ka'an i ja'a yo.

⁴¹ Jandaa kuu ja ñin yivi na kua'a ñin vasu nducha ko'o ra ja siki ja ka yi'i ra jiin Cristo, ti jandaa kuiti kuu ja iyo ta'u i —kachi ya.

Kachi Jesús ja koo yo nundo'o nu na sa'a yo kuachi

(Mt. 18.6-9; 5.13; Lc. 17.1-2; 14.34-35)

⁴² Siin Jesús ka'an ya, ti ni kachi ya:

—Ñin nundo'o ka'nu xaan kundatu ñin chaa nu na xnda'u da ñin suchi lulu, ti sia'an tukaa kandixia i ru'u. Iyo va'a ga nu na kundikun sukun da jiin ñin yoso molino, ti na ki'in da chii nducha mar.

⁴³ Chi nu nau yivi kaña ini ja kuni sa'a i ñin kuachi jiin nda'a i, ti yachi na nakani ini i ja tu va'a. Na sa'a i nanu ja, ja ni kenchaa nda'a i un kua'an. Chi va'a ga na koo ñin ni nda'a i, ti kunukuachi i nuu Yandios ansu ja koo ndi nduu nda'a i, ti ki'in i nuu infiernu.

⁴⁴ Ti yukan, tindaku un tu kuū ti, ti ñu'un un tu nda'va kuiti.

⁴⁵ Xi nu nau yivi kaña ini i ja kuni kunchakuachi i jiin si'in i, ti na nakani yachi ini ja tu va'a. Ti na sa'a i nanu ja, ja ni kenchaa si'in i un kua'an. Ti va'a ga na koo ku'lu i najaa i nuu Yandios, ti ansu ja jiin ndinduu si'in i ki'in yi nuu infiernu.

⁴⁶ Ti yukan tındaku un, tu kuū ti, ti ñu'un un tu nda'va kuiti.

⁴⁷ Ti nu nduchi i sa'a ja na sa'a i kuachi, ti yachi na nakani ini i ja tu va'a. Ti na sa'a i nanu ja, ja ni tava i kua'an. Chi va'a ga na najaa i nuu Yandios jiin ñn ni nduchi i ti ansu ja ki'in yi jiin ndinduu nduchi i nuu infiernu.

⁴⁸ Ti yukan tındaku tu kuū ti, ti ñu'un un tu nda'va kuiti.

⁴⁹ Ko ja kuu maa ra naa ra, kuu nanu ja ni ka kivi ra nuu ñu'un, chi ja kondo'o koo nene ra, kuu nanu ja soko ra maa ra jiin nundo'o kondo'o ra un. Chi nanu ni ka chi'i ra ñii ja na sandoo ja ni soko ra nuu Yandios, nava ni kachi ley Moisés, ti sia'an sandoo Yandios ro'o naa ra jiin nundo'o un, nava na kunukuachi va'a ra nuu ya.

⁵⁰ Sa'a yo nanu ja ka kuu ra nanu ñii, chi nu ni naa xiko, tukaa kuajniñu yo ja kuu nuu ndeyu. Suni sia'an kuni ri jiin ra naa ra ja na kukutu ini ra jiin jnu'un xndaku ri, ti sia'an na kukuee kunchuku ra naa ra —kachi Jesús.

*Xndaku Jesús siki chaa ka xndoo ñasi'i
(Mt. 19.1-12; Lc. 16.18)*

10

¹ Yukan ni kee ya ñuu Capernaum, ti kua'an ya ichi ñuu Judea undi inga yu'u yucha Jordán. Ti ni ka kututu yivi nuu ya. Ti ni keja'a tuku ya xndaku ya nuu yivi un.

² Ti yukan ni ka jakoyo tijni chaa fariseo ja ka kuni xndichi da ya, ti ni ka jikajnu'un da:

—¿Iyo va'a ja xndoo ñn chaa ñasi'i da nu? —kachi da.

³ Ti ni kachi Jesús:

—¿Ndoo ni kachi ley Moisés? —kachi ya.

⁴ Yukan ni ka kachi da:

—Kachi ley Moisés ja ñin chaa kuu xndoo da ñasi'i da, nu na kua'a da ñin tutu nuu ña, ti kuu kendo ña —kachi da.

⁵ Yukan ti ni kachi Jesús:

—Sia'an ni ka'an Moisés, chi ndee ni'in ini ra naa ra, kachi ya.

⁶ Ko undi na ni nukoo ñuyivi, ni sa'a Yandios taka ndajniñu iyo nuu ñuyivi ja'a, ti ni sa'a ya ñin chaa jiin ñin ñasi'i.

⁷⁻⁸ Yukan kuu ja nu ni nanda'a ñin chaa jiin ñin ñasi'i, ti ndinduu da ni ka nduu da ñin ni ga jiin ñasi'i da. Tukaa ka kuu siin siin yivi, chi ñin ni ga ni ka kuu da.

⁹ Yukan kuu ja ñin chaa, tu kuu sasiiñ da ja ni chajna'an maa Yandios —kachi ya.

¹⁰ Yukan na ti ndaja'a ya, nu ni ka na jaa da ve'e jiin Jesús, ti ni ka jikajnu'un da ya nasa kuni ka'an jnu'un ni ka'an ya jiin yivi un,

¹¹ ti sa ni kachi ya:

—Nu ñin chaa na xndoo da ñasi'i da, ti nanda'a da jiin inga ña, ti yisikin chaa da ñasi'i da undi nuu ja sia'an.

¹² Suni sia'an kuu jiin ñin ñasi'i nu na xndoo ña yii ña undi nuu —kachi ya.

*Jikanta'u Jesús ja kuu suchi kuachi
(Mt. 19.13-15; Lc. 18.15-17)*

¹³ Yukan ti ni ka chakoyo yivi nuu ya jiin suchi kuachi ja na jniñ ya i. Ko ni ka jini ndaja'a ya ja sia'an ka kuni yivi un, ti tu ni ka ja'a da jnu'un ja tu'va yivi un nuu ya.

14 Ti nu ni jini Jesús ja ka nduxaan da nuu yivi un, ni kuiti ini ya, ti ni kachi ya jiiin da:

—Sia, na kikoyo i nuu ri, ti tu kasi ra ichi i naa ra. Chi yivi ja tu vixi ini, ti nde'e ini i nanu suchi kuachi sia'an, kuu kivi i nda'a Yandios ja na ta'u ya jniñu nuu i.

15 Chi na kachi ndaa ri ja tu yii kuantu'u in suchi lulu jnu'un Yandios ja na ta'u ya jniñu nuu i, chi ti kuni'in ga ini i, ti ansu in yivi ña'nu ja, ja ni kuni'in ini, chi tu janta'u i ja kivi i nda'a Yandios ja na ta'u ya jniñu nuu i —kachi ya.

16 Ti ni ki'in ya ndi in ndi in suchi kuachi un, ni jununchaa ya i, ni chuxndee ya nda'a ya siki i, ti ni jikanta'u ya nuu Yandios ja na koto ya i.

*Ɔn chaa riko jikajnu'un da Jesús
(Mt. 19.16-30; Lc. 18.18-30)*

17 Yukan ni siin ya ichi kua'an ya, ti jinu xaan in chaa ni chaa nuu ya. Ni jakunjiti da, ti ni kachi da:

—Chaa va'a kuu ni maestro. Ti kachi ni, Ɔnaa jniñu va'a sa'a na, ti na ni ta'u na nuu Yandios, ti kuncha na nuu andivi ja kuu saa ni? —kachi da.

18 Ti ni kachi Jesús:

—Ndoo ka'an ra ja chaa va'a kuu ri, ti tu iyo ni in chaa va'a, chi maa in ni Yandios.

19 Jini ra ja tu kusikinchaa ra ñasi'i, tu sakui'na ra, tu ka'an ra siki yivi, tu xdoña'an ra, kuandatu nuu tata ra nuu nana ra, kachi ley ya —kachi Jesús.

20 Yukan ti kachi da:

—Maestro, taka jniñu un ja ni siuku na undi lulu na —ni kachi da.

21 Ko ni nde'e va'a Jesús nuu da, ni kunda'au ini ya, ti ni kachi ya:

—Ɔn ni ga jniñu kumani ja sa'a ra. Kua'an ti xiko ndi'i ra taka ja ñava'a ra, ti tejna'an xu'un un nuu yivi nda'u. Sia'an ti sa kuñava'a ra yaji nuu andivi. Nu ni ndi'i ni sa'a ra un, yukan ti ña'an na cho'o —kachi ya.

²² Ko nu ni jiniso'o da ja sia'an ni ka'an Jesús, ni ndi'i ini da, ti ni kukui'ya xaan ini da ti kua'an da, chi vanuxia riko xaan da.

²³ Yukan ti ni nde'e vindaa ya nuu ndaja'a ya, ti ni kachi ya:

—Xaan ga yi ja kivi in chaa riko nda'a Yandios ja na ta'u ya jniñu nuu da —kachi ya.

²⁴ So ni ka naa ini ndaja'a ya ja sia'an ni ka'an ya. Ko ni kachi tuku ya:

—Hijo naa ra, xaan ga yi ja kivi in chaa riko nda'a Yandios ja na ta'u ya jniñu nuu da, chi ñukuu ga ini da taka ja ñava'a da.

²⁵ Yachi ga kivi in camellu yau in yiki tikui, ansu ja na kivi in chaa riko nda'a Yandios ti ta'u ya jniñu nuu da —kachi ya.

²⁶ Ko maa ndaja'a ya, vi'ga ni ka naa ini da, ti ka ndajnu'un da:

—¿Nau kuu chaa nanita'u nusa? —kachi da.

²⁷ Yukan ni nde'e ya nuu da naa da, ti ni kachi ya:

—Ja kuu yivi, tu kuu kuiti sa'a i, ko Yandios chi taka ni kuu sa'a ya, ti tu iyo ni in ja kendo sia'an ni ja tu kuu sa'a ya —kachi ya.

²⁸ Yukan na ti ni kachi Pedro jiin ya:

—Nde'e ni, saña naa na, ni ka xndoo na taka ja ka ñava'a na, ti vekoyo na jiin ni —kachi da.

²⁹⁻³⁰ Ti ni kachi ya:

—Jandaa ndixia kuu ja na kachi ri nasa kuu jiin yiví ja kuni kiví i nda'a Yandios ja na ta'u ya jniñu nuu i, vasu na xndoo i ve'e i, kua'a i, ñani i, tata i, nana i, ñasi'i jiin se'e i jiin ñu'un i. Ja sia'an ti su'va na ni'in yí vi'ga ja kuu taka ja ni ka xndoo i un. Chi koto u'u yiví maa i, ko nuu kuncha i andiví, tukaa kuu kuiti i.

³¹ Ko na jaa kiví ja xndichi Yandios nuu taka i, ti chaa ka ndo'o ini ja ka kuña'nu da vijna, nduu da sandi'i ni ga. Ti chaa ka kuu sandi'i ni ga vijna, nduu ña'nu ga da ja kuu kiví un —kachi ya.

*Ka'an tuku Jesús ja kuū ya
(Mt. 20.17-19; Lc. 18.31-34)*

³² Yukan ti ni ka kaa da ichi ñuu Jerusalén kuankoyo da. Yoxnuu Jesús, ti ka jindandikun ndi uxi uu ndaja'a un, ko so ka naa ini da kuankoyo da ti ka yu'u da, chi kua'an ya ichi nuu ka jito u'u yiví ya. Suni kuankoyo ga yiví ka skua'a jiin ya, ko suni ka yu'u i. Yukan ni kana siin ya ndi uxi uu ndaja'a ya un, ti ni kachi ya taka nundo'o ja kii siki ya.

³³ Ti kachi ya:

—Ja ka jini ra ja ni ka kaa yo vekoyo yo ichi ñuu Jerusalén. Ti yukan nakua'a yiví maa Se'e Yiví Ñuyiví nuu taka sutu Israel ka kuña'nu, jiin nuu chaa ka xna'an ley ini veñu'un ka'nu Israel. Ti chakuachi da ya, ti nakua'a da ya nuu yiví inga nación.

³⁴ Ti chaa un kusikincha da maa ya, tiví si'i da nuu ya, kua'a da tau ya, ti ka'ni da ya. Ko nu uni kiví, ti nandoto tuku ya ma'ñu ndiyí un —kachi ya.

*Jacobo jiin Juan ka jikan da #n ta'u nuu Jesús
(Mt. 20.20-28)*

³⁵ Yukan na ti Jacobo jiin Juan, se'e yɛi Zebedeo, ni ka tu'va da nuu Jesús ti ni ka kachi da:

—Maestro, ka kuni na ja kua'a ni ja ka jikan va —ka kachi da.

³⁶ Ti ni kachi Jesús:

—¿Ndoo ka kuni ra nusa? —kachi ya.

³⁷ Ti ni ka kachi da:

—Ka kuni na ja na nukoo na jiin ni kivi na nduña'nu xaan ni, ja ta'u ni jini nuu ni tu'u ñuyivi, ñin na nda'a kua'a ni, ti inga na ichi nda'a sajni ni —kachi da.

³⁸ Ti ni kachi ya:

—Ko ro'o, tu jini ra ndoo ka jikan ra, ¿xi kundee ra koo ndo'o koo nene ra jiin ri taka nundo'o kii siki ri, ti tava ini ra koto ra nundo'o un, vasu na kuū ra naa ra nu? —kachi ya.

³⁹ Ti ni ka kachi da:

—Tava ini na ja kondo'o na jiin ni —ni ka kachi da.

Ti ni kachi tuku ya:

—Jandaa ndixia kuu ja ka tava ini ra kondo'o ra jiin ri, ti koto ra nundo'o un vasu na kuu ra.

⁴⁰ Ko ja nukoo ñin ra ichi nda'a kua'a ri ti inga ra ichi nda'a sajni, tu kachi ri, chi yukan ja ka iyo tu'va ja kunchuku nu nau ja na kachi maa Yandios ja kuncha jiin ri —kachi ya.

⁴¹ Nu ni ka jiniso'o ndi uxi ga ndaja'a un, ti ni ka kiti ini da nuu Jacobo jiin Juan.

⁴² Ko ni kana Jesús tendi'i da, ti ni kachi ya:

—Ka jini ra ja chaa kuña'nu nuu ñin nación, ti maa da xiin, chi kuña'nu ga da, ti taka chaa ka kuña'nu jiin da, ta'u da jini nuu.

43-44 Ko ansu sia'an kuu jiin ra naa ra. Chi su'va, nu nau ro'o ka kuni kuña'nu ga nuu uu ga chaa ja'a, ti su'va na kuanukuachi da nuu ra naa ra. Chi sava'ni ga ja na kuni kuña'nu, ti su'va nduu nanu iin muzu.

45 Chi maa Se'e Yivi Ñuyivi, ni chaa ya, ko ansu ja kunukuachi yivi nuu ya, chi su'va ja na kunukuachi ya nuu yivi. Ti nakua'a da maa ya ja na chunaa ya nuu kuachi yivi naa i, nava na nanita'u i —kachi ya.

(Mt. 20.29-34; Lc. 18.35-43)

46 Yukan ti ni ka jaa da ñuu Jericó. Ko ni siin ya kua'an ya jiin ndaja'a ya, ti kua'a yivi kuankoyo. Ko nu ni kenda ya yu'u ñuu un, yukan nukoo iin chaa kuaa nani Bartimeo, kuu da se'e yi iin chaa nani Timeo, ti yukan jikan da xu'un.

47 Ti nu ni jiniso'o da ja Jesús, chaa ñuu Nazaret, kuu ya vaji un, ni kanako'o da:

—¡Ni'in Jesús! ¡Maa ni ta'u jniñu nanu ni sa'a rey yo David na jana'an, kunda'u ini ni saña! —kachi da.

48 Tijni yivi ni ka nduxaan nuu da ja na kasi yu'u da, ko maa da vi'ga ni kanako'o da:

—¡Ni'in Jesús! ¡Maa ni kuu ja ta'u jniñu nanu ni sa'a rey yo David na jana'an, kunda'u ini ni saña! —kachi tuku da.

49 Yukan ni jakuiñi Jesús, ti ni kachi ya:

—Kana da na kii da —kachi ya.

Ni ka kana da chaa un, ti ni ka kachi da jiin da:

—Koto ndi'i ini ra. Ndokuiñi, ña'an na cho'o, chi kana ya ro'o —kachi da jiin chaa kuaa un.

50 Ti chaa un ni skaña da tikachi da, ti ni ndokuiñi da kua'an da nuu Jesús.

⁵¹ Ti Jesús ni jikajnu'un ya maa da:

—¿Ndoo kuni ra ja sa'a ri jiin ra nusa? —kachi ya.

—Maestro, kuni na ja na ndundijin nduchi na —kachi da.

⁵² Ti ni kachi Jesús jiin da:

—Kuano'on, ja ni nduva'a ra, chi ni kandixia ra jniñu sa'a ri —kachi ya.

Ti hora ni, ni ndundijin nduchi chaa kuaa un, ti ni nandikun da Jesús, ti kua'an da jiin ya.

Kivi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11

¹ Nu ni kuyajni ya ñuu Jerusalén, yajni ñuu Betfagé jiin Betania, yajni yuku Olivos,

² Ti yukan ni taji ya uu ndaja'a ya, ti ni kachi ya:

—Kuankoyo ñuu kande ndijin un. Ti yu'u ñuu un ndiku ñin burru, ja ti koso ga yivi ti. Ndaji ti ti kii ra jiin ti.

³ Ti nu nau chaa jikajnu'un ndoo ka ndaji ra ti, ti kachi jiin da “Maa Jito'yo nandi'i da ti”, kachi ra —kachi ya.

⁴ Ti kuankoyo nduu ndaja'a ya un, ti ni ka nani'in ndixia da burru un ndikun ti yu'u ichi un, yajni ñin ve'e. Ti ni ka keja'a ka ndaji da ti.

⁵ Ti ñin chaa ka'iin un ni kachi:

—¿Ndoo ka sa'a ra, ja sa burru jña ka ndaji ra? —kachi da.

⁶ Ti maa da ni ka kachi da nava ni kachi Jesús jiin da, ti sa ni ka ja'a chaa un jnu'un kuankoyo da jiin burru un.

⁷ Ni ka nandeokuñi da jiin burru un nuu ya. Ni ka chuku da tikachi da siki ti, ti ni kaa Jesús siki ti, ti ni ka siin da ichi kuankoyo da.

⁸ Kua'a xaan yivi ni ka chuku i tikachi i ini ichi un nuu kuan ya'a ya. Ti sava ga yivi un ka ja'nu i ndayuku ti ka chuku i ini ichi un.

⁹ Ti yivi ka yoxnuu nuu Jesús jiin yivi ka jindandikun ichi jata ya, ni ka keja'a ka kuvaa i, ka kanajaa i Yandios:

—Na kuta'u yo nuu Yandios, ja ni taji ya ñn chaa kuña'nu xaan vaji, nakua'a ya ja va'a da.

¹⁰ Vaji da ja na ta'u da jniñu sia'an nanu ni ta'u tata yo rey David na jana'an. ¡Na kanajaa ndaja'a ya undi andivi un ja na kuña'nu chaa ja'a! ¡Sia'an na kachi ya! —ni ka kachi i.

¹¹ Sia'an ni kivi Jesús ñuu Jerusalén. Ti kua'an ya undi veñu'un ka'nu Israel. Yukan ni jini ya taka ja ka sa'a yivi un. Ti nu kuan ini, ti ni nandeokuñi ya ñuu Betania jiin ndi uxi uu ndaja'a ya.

Nundo'o ni ndo'o ñn nutichi vixi
(Mt. 21.18-19)

¹² Nu ni kuxian inga kivi, ni kee ya ñuu Betania, ni nandeokuñi tuku ya ñuu Jerusalén, ti ichi kua'an ya ni chaa sokō ini ya.

¹³ Ti jaa yajni tili un ni jini ya ñn nutichi vixi, ko tu ni ni'in ya ni ñn tichi, chi ansu yoo iyo tichi kuu.

¹⁴ Yukan ti ka ñuso'o ndaja'a ya ni ka'an ya jiin nutichi un:

—¡Na kachi ri ja jankivi ga kua'a ra tichi vixi!
—kachi ya jiin yujnu un.

Ni keni'in Jesús yiví ka xiko ini veñu'un ka'nu Israel

(Mt. 21.12-17; Lc. 19.45-48; Jn. 2.13-22)

¹⁵ Nu ni jaa ya ñuu Jerusalén, ni kivi ya ini veñu'un ka'nu un, ti ni keni'in ya taka yiví ka xiko jiin ja ka jaan yuxe'e un kuankoyo i. Ni skuiokava ya mesa chaa ka sama xu'un, jiin silla chaa ka xiko sata.

¹⁶ Ti tu ni ja'a ya jnu'un ja kivi yiví ka ndiso ndajniñu ja xiko nuu yuxe'e un.

¹⁷ Yukan ti ni xndaku ya nuu yiví un:

—Ka jini ra naa ra ja yoso nuu tutu ii Yandios: “Ve'e ri konani ve'e nuu kakanta'u yiví taka nación.” Ko ro'o naa ra ni ka nasa'a ra ve'e ri nuu ka nataka ñakui'na —kachi ya.

¹⁸ Ti chaa ka kuu sutu kuña'nu un jiin chaa ka xna'an ley ini veñu'un un, ni ka jiniso'o da jnu'un ni ka'an Jesús. Tu ni ka jajna'an ini da. Ti ni ka keja'a ka nduku da nasa ka'ni da ya. Ko kivi un tu ni ka sa'a da, chi ka yu'u da sa kití ini yiví un naa i, chi tendí'i yiví un ka kusíi xaan ini i ka ñuso'o jnu'un ka'an ya.

¹⁹ Ko nu kuan kuña, ti kua'an Jesús jiin ndaja'a ya inga ñuu un.

Ndoo ni ichi nutichi vixi un

(Mt. 21.20-22)

²⁰ Yukan ti jaña'an inga kivi, kuankoyo tuku da ichi un, ti ni ka jini da nutichi vixi un ja, ja ni ichi undi yo'o.

²¹ Yukan ti ni nuku'un ini Pedro jnu'un ni ka'an Jesús, ti ni kachi da jiin ya:

—Maestro, nde'e ni nutichi vixi ja'a, ja ni ka'an ni sikí iku, ja ni ichi —kachi da.

22 Yukan ti ni kachi Jesús jiin da:

—Kandixia ndaa nuu Yandios.

23 Chi nu ni ini ni añu ra na kakanta'u ra nuu Yandios, ti kachi ra jiin in yuku ja'a: “Kuancha'a ti ki'in ra nuu mar un”, ti nu ñukuu ni ini ra ja sia'an na kuu, yukan ti jandaa ni kuu ja kuandatu yuku un nuu ra.

24 Chi jandaa na kachi ri ja taka ndoo na kakanta'u ra nuu Yandios, ti kua'a ya nu ñukuu ni ini ra ja ni'in ra, ti ni'in ra.

25 Ti nu ka jikanta'u ra, kuanka'nu ini nuu yivi jito u'u ro'o, nava Tata yo Yandios, ya kancha andivi, na kuanka'nu ini ya nuu kuachi ra naa ra.

26 Ko nu tu kuanka'nu ini ra nuu yivi, suni sia'an tu kuanka'nu ini Tata yo Yandios, ya kancha andivi, nuu kuachi ra —kachi ya.

Siki jniñu ndiso Jesús

(Mt. 21.23-27; Lc. 20.1-8)

27 Nu ni ka jaa da ñuu Jerusalén, ti kuankoyo tuku da nuu yuxe'e veñu'un ka'nu un. Yukan jikonuu Jesús ti ni ka tu'va sutu ka kuña'nu, jiin chaa ka xna'an ley ini veñu'un un, jiin taka chaa kuña'nu un naa da.

28 Ti ni ka jikajnu'un da ya:

—¿Nau ja ni ja'a jniñu nuu ra ja sa'a ra taka jniñu ja'a? ¿Nau ja xiin jniñu ña'nu ja'a ja sa'a ra? —kachi naa.

29 Ti ni kachi ya jiin yivi un:

—Suni ru'u na kajnu'un ri ro'o naa ra, ti nu ni ka kachi ra, ti sa na kachi ri nuu ra nau ni ja'a jniñu ja'a nuu ri.

³⁰ Kachi naa ra: ¿Nau ja ni taji Juan, chaa ni kii skuanducha yiví naa i, Yandios xi ñn yiví nusa? —kachi ya.

³¹ Ti ni keja'a ka ndajnu'un chaa un naa da:

—¿Nasa kachi yo nusa? Chi tu kuu kachi yo ja Yandios ni taji Juan chi kachi Jesús jiin yo: “¿Ndoos tu ni ka kandixia ra jnu'un ni ka'an da nusa?”

³² Ni tu kuu kachi yo ja yiví ni taji chaa un —ni ka kachi da.

Ti sia'an ni ka ndajnu'un da ja tu kachi da naa da, chi ka yu'u da sa kití ini yiví nuu da, chi tendí'i i ka jini ja Yandios ni taji Juan ni kii da.

³³ Ti yukan ni ka kachi da jiin Jesús:

—Tu ka jini na nau ja ni taji chaa un —kachi da.

Yukan na ti ni kachi ya:

—Vanuxia tu ka kuni ra kachi ra, ti suni ru'u tu kachi ri nuu ra naa ra nau ja ni ja'a jniñu ña'nu ja'a nuu ri, ja kuu sa'a ri taka jniñu un —kachi ya.

*Siki muzu ni ka sa'a ndeva'a
(Mt. 21.33-46; Lc. 20.9-19)*

12

¹ Yukan ni keja'a Jesús xndaku ya nuu da naa da, ti ni kachi ya:

—Ñn chaa ni sa'a da ñn huerta, ti ni xndee kua'a da nutika'ya. Ni chi'i da jaku yuu huerta un. Suni ni sa'a da ñn nundoo ka'nu xaan nuu kaxin da tika'ya un. Ni sa'a da ñn ve'ev sukun, nuu kotonchaa da ni tu'u ñu'un da. Yukan ti ni jakanchaa da nuu uu chaa ka sa'a jniñu un, ti kua'an da viaje.

² Yukan ti ni jaa kivi naki'in da jniñu da, ti chaa xiin huerta un, ni taji da ñn muzu kuan nuki'in sava jniñu un nava ni'in da kuu da.

³ Ko chaa ka yinda'a huerta un, ni ka ki'in da muzu un ni ka kani da, ti ni ka nataji da kuano'on. Ti tundo ni ka ja'a kuiti da kunda'a chaa un.

⁴ Ti chaa xiin huerta un ni taji tuku da inga muzu kua'an. Ti chaa ka yinda'a huerta un ni ka stuji da xini, ti ni ka ja'a xaan da tau muzu un.

⁵ Ni taji tuku da inga muzu kua'an, ko chaa ka sajniñu un ni ka ja'ni da muzu un. Yukan ti ni taji tuku da tiji ga muzu un kuankoyo, ko suni sia'an ni ka ja'a da tau muzu un. Sava da ni ka ndo'o, ti sava ga da ni ka ji'i.

⁶ Ko iyo vajnu'un ga se'e yi chaa un ja kunda'u xaan ini da, ti suni ni taji da chaa lulu un kua'an da, chi ndo'o ini da, “Va kuandatu chaa ka sajniñu un nuu se'e ri, chi ka jini da ja se'e ri kuu i”, kachi da.

⁷ Ko nu ni jaa chaa lulu un yuxe'e chaa ka sa'a jniñu un, ti ni ka kachi da: “Ja'a kuu se'e yi jito'o huerta ja'a. Va'a ga na ka'ni yo, ti nava na kendo yo jiin huerta ja'a”, ni ka kachi chaa un.

⁸ Yukan na ti ni ka jni da chaa lulu un, ni ka ja'ni da, ti ni ka jan skaña da ndiyi un nuu yu'u huerta un —ni kachi Jesús.

⁹ Siin Jesús ka'an ya, ti ni kachi ya:

—Ja sia'an ni kuu, ¿nasa ka ndo'o ini ra ja sa'a chaa xiin huerta un nusa? Xi ki'in da ti ka'ni da chaa ni ka sa'a jniñu un, ti kua'a da ñu'un nuu inga yivi.

¹⁰ Xi tu ka ka'u ra nasa ka'an nuu tutu Yandios:

Yuū ni ka skaña chaa ni ka sa'a nama ja'a, kuu yuū kanuu ga ja ndiso ndi'i jiki ve'e.

¹¹ Maa Yandios ni sa'a sia'an, ti so naa ini yo nde'e yo jniñu ni kuu jiin yuū ja'a.

Kachi tutu —ni kachi Jesús.

¹² Nu ni ka'an Jesús sia'an, ti chaa ka kuña'nu Israel un, ni ka nduku da nasa kuu jniñi da Jesús, ko ni ka yu'u da nde'e da yivi un. Chi ni ka chaku ini da ja siki maa chaa ka kuña'nu un, ni ka'an Jesús jnu'un un. Yukan ti ni ka xndoo da ya ti kuankoyo da.

Siki jnu'un kinya'u puesto
(Mt. 22.15-22; Lc. 20.20-26)

¹³ Yukan sa ni ka taji da sava chaa fariseo jiin sava chaa ka yi'i jiin Herodes, ja na nduku da nasa ka'an da jiin ya inga jnu'un, ti sia'an na kuu chakuachi da ya.

¹⁴ Ni jakoyo chaa un, ti ni ka kachi da:

—Maestro, jini na ja kuu ni ñin chaa yiñu'un, chi ka'an ndaa ni, ti tu ki'in ni jnu'un vasu nasa ka ka'an yivi siki ni. Suni tu yu'u ni nde'e ni yivi kuña'nu ga. Chi su'va xna'an ndaa ni ichi Yandios nuu i. Ko kachi ni, ¿iyo va'a ja cha'u yo xu'un puestu nuu gobierno Romano xi tuu nu? ¿Va'a ga ja tu cha'u yo nu? —kachi da.

¹⁵ Ko Jesús ja jini va'a ya nasa ka ndo'o ini da ja ka jikajnu'un da jnu'un un, ti ni kachi ya:

—¿Ndoo ka ndo'o ñaa ini ra ja ka kuni xnda'u ra ru'u naa ra, ja ka kuni ra chakuachi ra siki ri? Chan ñin xu'un na Kotonchaa ri —kachi ya jiin da.

¹⁶ Ti ni ka ja'a da ñin xu'un nuu ya. Yukan na ti ni kachi ya:

—¿Naa nūū kuu ja nchaa nuu xu'un ja'a, ti naa sivi kuu ja yoso nuu xu'un ja'a nusa? —kachi ya.

Ti ni ka kachi da:

—Nūū maa rey nación Roma kuu —kachi da.

¹⁷ Yukan na ti ni kachi Jesús:

—Nusa ti kua'a nuu rey nación Roma ja xiin maa da, ti kua'a nuu Yandios ja xiin maa Yandios —ni kachi ya.

Ti so ni ka naa ini da jnu'un ni ka'an Jesús jiin da.

Jnu'un siki ja ka nandoto ndiyi
(Mt. 22.23-33; Lc. 20.27-40)

¹⁸ Suni ni ka kikoyo tijni chaa Saduceo nuu Jesús, chaa ka ka'an ja tukaa ga ka nandoto kuiti ndiyi. Ti ni ka kachi da:

¹⁹ —Maestro, nuu ley Moisés ka'an ja nu ñin chaa ni nanda'a, ti nu na kuū da, ti xndoo da ñasi'i da. Ti nu tu ni ñin se'e da ni iyo, ti ñani ndiyi un nanda'a tuku jiin ña'an un nava na koo ñin se'e da jiin ña, ja tu ni iyo se'e ña jiin ndiyi un. Ti suchi lulu un naki'in yi sivi ndiyi un, ti kendo i jiin tendi'i yaji ni xiin da.

²⁰ Ko ñin jinu ni iyo uxia chaa ni ka kuu ñani, ti chaa ña'nu un ni nanda'a da, ko ni ji'i da, ti tu ni iyo ni ñin se'e da.

²¹ Ti chaa kuu uu un, ni nanda'a jiin ña'an un, ko suni ni ji'i da, ti tu ni iyo ni ñin se'e da jiin ña. Ti suni sia'an ni jna'an chaa kuu uni.

²² Sia'an ni kuu jiin ndi uxia da, vasu ni ka nanda'a da jiin ña'an un, ko tendi'i da ni ka ji'i, ti tu ni ka iyo ni ñin se'e da jiin ña. Ti sandi'i ni ga suni ni ji'i ña'an un.

²³ Nusa ti nu na nandoto ndiyi un ti kuchaku tuku da, ¿nau ñin ñin da xiin ñasi'i un, ja sia'an ndi uxia da ni ka nanda'a jiin ña nusa? —kachi chaa un.

²⁴ Yukan na ti ni kachi Jesús jiin da naa da:

—Ka yuji ra jnu'un ka ka'an ra naa ra, chi va tu ni ka chaku ini ra nava yoso nuu tutu ii. Ni tu chaku ini ra ñin jniñu ña'nu sa'a Yandios. Yukan kuu ja ka ka'an ra sia'an.

²⁵ Ko kivi na nandoto ndiyi un naa i, tukaa kuu i nanu ni kanda i nuu ñuyivi ja'a. Ni tu nanda'a i, ni tu xnanda'a i sesi'i i, chi kuu i nanu ángel Yandios kanchuku nuu andivi.

²⁶ Ti siki jnu'un ja nandoto ndiyi un, ti ka chaku ini ra, xi tu ka ka'u ra nuu tutu ni chaa Moisés, nuu kachi ja ma'ñu yañu'un un ni ka'an Yandios jiin da, ti ni kachi ya: “Ru'u kuu Yandios ni ka nchañu'un Abraham, Isaac jiin Jacob.”

²⁷ Sia'an ni ka'an Yandios jiin Moisés, chi maa ya kuu Yandios yivi ka chaku, ansu Yandios yivi ni ka ji'i. Yukan kuu ja ka yuji ra naa ra jiin jnu'un ka ka'an ra —kachi Jesús.

*Ñin ley kanuu xaan ga
(Mt. 22.34-40)*

²⁸ Ti ñin chaa xna'an ini veñu'un Israel kande da un, ti ni jiniso'o da jnu'un ndajnu'un Jesús jiin chaa un. Ni jini da ja va'a ka'an ya, ti ni jikajnu'un da ya:

—¿Nau ñin ley Yandios kuu ja kanuu xaan ga nusa? —kachi da.

²⁹ Ti ni kachi Jesús.

—Īn ley Yandios ja kanuu xaan ga kuu ja'a: “Chunso'o naa ra ro'o yiv'i Israel. Tata yo Yandios maa ĩn ni ya iyo.

³⁰ Na kuu ini ra Tata yo Yandios jiin ni ini ni añu ra, jiin ndi'i inijnuni ra, ti jiin niini ra kunukuachi ra nuu ya.” Yukan kuu ley undi nuu.

³¹ Ti inga ley kanuu xaan kuu ja'a: “Kunda'u ini nuu ñanijna'an ra nanu kunda'u ini ra nuu maa ra.” Ndĩnduu ley yukan kuu ja kanu xaan ga siuku ra, ti tukaa iyo inga —kachi ya.

³² Yukan ti ni kachi chaa xna'an ley jiin Jesús:

—Va'a ni ka'an ra, Maestro. Jandaa ka'an ra ja maa ĩn ni Tata yo Yandios iyo, ti tukaa iyo inga,

³³ ja na kuu ini yo nuu Yandios jiin ni ini ni añu yo, jiin inijnuni yo, ti jiin niini yo na kunukuachi yo nuu ya. Ti na kunda'u ini yo nuu ñanijna'an yo nanu kunda'u ini yo nuu maa yo. Chi kanuu xaan ga ndixia uu ley ja'a ja na kuandatu yo, ti ansu ja soko yo taka ja ñava'a yo nuu altar un —kachi da jiin ya.

³⁴ Ni jini ya ja ni ka ka'an ndaa kuiti da, ti ni kachi ya:

—Ja kuan kuyajni ndivikoyo ra nda'a Yandios ja ta'u ya jniñu nuu ra —kachi ya.

Yukan ti ni ĩn chaa ka kuña'nu un tukaa ni ka ka'an kuiti ga da ja kajnu'un ga da ya.

*¿Naa se'e kuu Cristo nusa?
(Mt. 22.41-46; Lc. 20.41-44)*

³⁵ Nu ni xna'an Jesús ini veñu'un ka'nu Israel yukan, ni kachi ya:

—¿Nasa kuu ja ka jani ini chaa ka xna'an ini veñu'un un, ti ka ka'an da ja Cristo kuu se'e nuu

tata yo David na jana'an? Ko na kachi ndaa ri ja kuña'nu ga Cristo nuu tata yo David.

³⁶ Ti maa David ni chaa da nuu tutu jiin inijnuni Espíritu Santo nuu kachi sia'an:

Maa Yandios ni kachi sia'an jiin Cristo, ya kuu jito'o ri:

“Nukoo nda'a kua'a ri, chi ta'u ra jniñu jiin ri.

Iyo yívi jito u'u ro'o, ko kundee ra jiin, chi chindee ri ro'o.”

Ni kachi Yandios, kachi David.

³⁷ Nusa, ¿ti nasa kuu Cristo ñin jna'an rey David jana'an, ti maa da ni kachi ja Cristo kuu jito'o da nusa? —ni kachi Jesús.

Ti nu ni ka'an ya sia'an, ti ni ka kusii ini yívi kua'a ka'iin un.

*Ka'an Jesús siki chaa ka xna'an ley Israel
(Mt. 23.1-36; Lc. 11.37-54; 20.45-47)*

³⁸ Siin Jesús xna'an ya, ti ni kachi ya:

—Koto maa ra jiin chaa ka xna'an ley ini veñu'un un. Koto sa'a ra nava ka sa'a da naa da. Chi chaa un ka jajna'an ini da ku'un da sa'ma nani nava na nakuni yívi ja chaa kuña'nu ka kuu da. Ti nu ka jikonuu da calle un, kuni da ja na kanxia'u yíñu'un yívi jiin da.

³⁹ Ti ja kuu ini veñu'un ka nduku da nuu nukoo da nuu kuña'nu ga kunchuku da. Suni ja kuu ñin viko, xnaka da ka nukoo yu'u mesa nuu iyo va'a ga.

⁴⁰ Suni ka jisonchaa da ve'e ña'an ni ka kendo nda'u, ti ja na chisa'yí da jniñu ni ka sa'a da un, ti na'an xaan ka jikanta'u da nuu Yandios. Sia'an ka sa'a da nuu chitu yívi. Ko ja kuu maa da, kii ñin nundo'o ka'nu xaan ga —ni kachi ya.

Xu'un ni soko ñn ña'an nda'u
(Lc. 21.1-4)

⁴¹ ñn kivi nukoo Jesús nuu veñu'un ka'nu un, yajni nuu kancha ñn kaja nuu kivi xu'un ka soko yivi. Nde'e ya ka chu'un ka chu'un yivi xu'un nuu kaja un. Ni jini ya ja taka yivi riko, kua'a xu'un ka chu'un nuu kaja un.

⁴² Ti sandi'i ni ga ni jaa ñn ña'an nda'u xaan, ti ni chu'un ña uu xu'un cobre kuachi ini kaja un.

⁴³ Yukan ti ni kana Jesús ndaja'a ya, ti ni kachi ya jiin da:

—Nde'e naa ra. Ña'an un, ya'u xaan ga nchaa xu'un ni ja'a ña nuu Yandios ansu xu'un ni ka ja'a cha riko un.

⁴⁴ Chi yivi riku un ka ja'a da jaku ni ja ka ñava'a da. Ko ña'an nda'u un, vasu nandi'i ña ja kuu gastu ña, ko ni soko ndi'i ña nuu Yandios —ni kachi ya jiin da naa da.

Ka'an Jesús ja naa venu'un ka'nu Israel
(Mt. 24.1-2; Lc. 21.5-6)

13

¹ Nu ni kee Jesús veñu'un ka'nu un, ti ñn ndaja'a ya ni kachi jiin ya:

—Maestro, nde'e ni. Xaan na'nu yuū ja'a, ti xaan vii kaa veñu'un ja'a—kachi da.

² Ti ni kachi Jesús:

—Ndixia ra chi vii xaan kaa, ko jaa ñn kivi ja ni ñn yuu tukaa kendo kosojna'an, chi ndi'i ja'a naa —kachi ya.

Taka seña koo nu ja kuan kuyajni ndi'i ñuyivi yo
(Mt. 24.3-28; Lc. 21.7-24; 17.22-24, 31)

³ Yukan ti kuankoyo da undi yuku Olivo, ja kendo yajni ichi nuu yuxe'e veñu'un ka'nu un, ti ka tu'va Pedro, Jacobo, Juan jiin Andrés, ti ni ka jikajnu'un da ya:

⁴ —¿Naa kivi kundaa jnu'un ni ka'an ni ja naa veñu'un ka'nu un? ¿Ti naa seña kuni na nu ja kuan kuyajni kundaa jnu'un ja'a? —ka kachi da.

⁵ Ti ni kachi ya jiin da:

—Koto maa ra naa ra nava tu xnda'u yivi ro'o.

⁶ Chi kua'a yivi kikoyo, ti ndaku ni'in yi sivi ri, ti kachi yi ja maa i kuu Cristo, ko so ja na xnda'u i kua'a xaan yivi.

⁷ Ti nu ni ka jini ra ja iyo guerra, xi ja koo guerra, koto yu'u ra. Sia'an kuu, ko changa ga jaa kivi ndi'i ñuyivi ja'a.

⁸ Chi kanaa iin nación jiin inga nación. Suni kanaa iin ñuu jiin inga ñuu, ti koo guerra taka ñuu. Suni kii ñujnaa ya yukan, ti koo jnama xaan tonto, ti ndi'i xaan ini yivi. Ko ansu ja'a ni kuu ndi'i, chi sa ni keja'a nundo'o un, ti su'va kii ga —ni kachi ya.

Koto u'u yivi nuu chaa ka kandixia

⁹ Siin Jesús ka'an, ti ni kachi ya:

—Koto ra maa ra chi iin kivi ti jni yivi presu ro'o, ti ki'in ra nuu juez jiin nuu chaa ka kuña'nu ini taka veñu'un Israel, ti kani da ro'o naa ra. Ti undi nuu ndaja'a gobierno stuu ra maa ra ja ka kandixia ra ru'u jiin jnu'un ka'an ri. Chi sia'an ti sa kuniso'o da jnu'un ichi Yandios.

¹⁰ Chi xnakan kuichanuu jnu'un Yandios nuu yivi taka nación ti sa ndi'i ñuyivi.

¹¹ Ti nu ni ka jni yivi presu ro'o, tu xndi'i ra ini ra ja nasa koo jnu'un ka'an ra nuu justicia. Chi hora

kua'a ra jandaa nuu da, ti maa Espíritu Santo kua'a taka jnu'un ka'an ra un.

¹² Ti yivi un naa i, nakua'a yi ñani yi nuu sticia ja na ka'ni da i siki ja ka kandixia ra ru'u. Ko nu nau ja tu kaka yata, ti siin ndaa kuiti jiin jnu'un ri undi kivi sandi'i ni ga, ti yivi un kuu ja nanita'u.

¹³ Ti taka ñuu koto u'u yivi ro'o naa ra siki ja ka kandixia ra ru'u. Ko nu nau ja tu kaka yata ti siin ndi kuiti jiin jnu'un ri undi kivi sandi'i ni ga, ti yivi un kuu ja na nita'u —kachi Jesús.

Koto u'u jna'an yivi ini veñu'un ka'nu un

¹⁴ Siin ka'an Jesús, ti ni kachi ya:

—Nu ni ka jini ra ja kandichi ñn ndajniñu kue'e nuu ve'e ii ini veñu'un ka'nu un, yukan ti yivi ka'u tutu ja'a na chaku ini i nau ja kuu. Ti yivi kanchuku ñuu Judea, na kua'a i corri na nama i maa i undi chii yuku un.

¹⁵ Nu ñn yivi ndetatu i yuxe'e i, koto ndivi i ini ve'e i ja ki'in yi ndajniñu i.

¹⁶ Ti yivi kande ñn rancho, koto nandeokuñi i ve'e i ja ki'in i sa'ma i.

¹⁷ Na nda'u ñaa ka ñuse'e xi ñaa ka nchaka suchi yikin, chi tu kanda ña kunu yachi ña ja kuu kivi un.

¹⁸ Kakanta'u naa ra nuu Yandios ja tu kua'a ya jnu'un kondo'o ra yukan ja kuu ñn viko sau xaan.

¹⁹ Chi kivi un koto ra nundo'o ka'nu xaan tonto ja tu ni ka ndo'o ra undi na ni sa'a Yandios ñuyivi. Ti ni tukaa ga koo inga nundo'o nanu ja'a.

²⁰ Ko sa ti tu ni xnukuu Yandios kivi un, ti va ni ñn yivi tu kaku. Ko ni xnukuu ya kivi un siki ja ni kunda'u ini ya taka yivi ni nakaji ya ja na nanita'u i —ni kachi ya.

Kikoyo chaa xndoña'an

²¹ Siin ka'an Jesús, ti ni kachi ya:

—Nu ni jaa kivi un, koto kandixia ra naa ra jnu'un ka'an yivi ti kachi: “Nde'e, ja'a kancha Cristo ja ni taji Yandios ja ta'u jniñu ña'nu”, xi kachi: “Nde'e, yukan kancha ya.”

²² Chi kikoyo kua'a yivi xndoña'an, ti kachi i ja maa i kuu Cristo, xi kachi ja kuu ñin chaa ka'an jnu'un Yandios. Ti sa'a i tijni nuu jniñu ña'nu ja na xndoña'an i yivi ka kandixia. Nu na kuu, ti suni xnda'u yivi ni nakaji Yandios.

²³ Ko koto kandixia ra naa ra ja xnda'u yivi un ro'o, chi ja ni kachi ri taka seña kii ja kuni ra naa ra.

Nasa ndii Jesús

(Mt. 24.29-36, 42-44; Lc. 21.25-36)

²⁴ Ko nu ja ni ndi'i ni kii nundo'o un, yukan ti kuñaa nuu ndikandii, ti yoo, tukaa ga kua'a nduva.

²⁵ Ti nukoyo chuxini nuu andivi, ti ni'in ni tu'u ja iyo nuu andivi.

²⁶ Yukan na ti ru'u, maa Se'e Yivi Ñuyivi, kuni ra ndenda ri nuu viko un, ti nchaa ri jiin jniñu ña'nu xaan ga.

²⁷ Ti taji ri Yandios kinkoyo undi sandi'i ni ga ndi kuun jiki ñuyivi jiin andivi, ti nastutu i taka yivi ni nakaji Yandios ja kuu se'e ya.

²⁸ Nde'e ra ñin nutichi vixi ti kuni ra. Nu ja ni ndi'i ni nakoyo nda'a yujnu un ti vee nene numa, yukan ni jini yo ja kuan sama kivi ti kuan kuyajni viko sau.

²⁹ Sia'an kuu jiin ra naa ra, chi nu ja ni ndi'i nundo'o un kuan kundaa, yukan ti chaku ini ra ja kuan kuyajni ndaa ni ga kivi nchaa ri.

³⁰ Chi na kachi ndaa ri ja taka yivi ka chaku vijna, tu naa i undi na jaa kivi kundaa taka jnu'un ka'an ri ja'a.

³¹ Ti andivi jiin ñuyivi ndi'i kuiti naa, ko jnu'un ka'an ri chi jankivi naa, ti ndi'i un kundaa.

³² Ko ja kuu kivi un, maa Yandios kuu ja jini na kivi kundaa taka jnu'un un. Ni ángel Yandios tu ka jini, ni ru'u ja kuu ri se'e ya.

³³ Ko ro'o naa ra, kundito ini ra, chi ni tu ka jini ra na kivi kundaa taka jnu'un un.

³⁴⁻³⁵ Kuu nanu ñn chaa kua'an viaje, ti tu ni kachi da na kivi nchaa da. Ti ni xndoo da muzu da ja na koto tendi'i jniñu iyo. Ni tejna'an da jniñu nuu ñn ñn muzu un. Ti ni ta'u da jniñu nuu inga muzu ja na koto ve'e da. Ko muzu un naa da, tu ka jini da na kivi nchaa jito'o da. Suni sia'an ro'o naa ra, tu ka jini ra na kivi nchaa ri. Yukan kuu ja kotu'va naa ra, chi tu ka jini ra nu nchaa ri kuan kuu tiki'vi, xi nchaa ri ñúú, xi hora kana li'i ni ga, xi kuan kuxian ni ga ti nchaa ri.

³⁶ Chi sanaa ini ra naa ra ti nchaa ri, ti na ni'in ri ro'o ka kixi ini ra.

³⁷ Jnu'un ka'an ri jiin ra naa ra, suni sia'an ka'an ri jiin tendi'i yivi naa i. Yukan kuu ja kotu'va naa ra —kachi Jesús.

*Ka ndajnu'un da nasa jni da Jesús
(Mt. 26.1-5; Lc. 22.1-2; Jn. 11.45-53)*

14

¹ Ka nasa'a chaa Israel uu viko ja tu ka naa ini da na ni keni'in Yandios maa da naa da ñuu Egipto, ja ni kunda'u ini ya maa da. Ti viko un kuu viko pascua, jiin viko ka yee da staa stila tu yi'i

levadura. Ko kumani uu ga kivi ja kuu viko un. Ti sutu ka kuña'nu jiin chaa ka xna'an ley ini veñu'un un, ka kuni jni xe'e da Jesús, ti ka'ni da ya.

² Ko ka ndajnu'un da:

—Tu kuu sa'a yo kivi viko ja'a, chi sandau ndon-daa yivi siki yo —kachi da.

*Īn ña'an ni chu'un perfume xini Jesús
(Mt. 26.6-13; Jn. 12.1-8)*

³ Yukan ti kancha Jesús ve'e Simón ñuu Betania, ĩn chaa ni jna'an kue'e ndi'yi te'yu. Nukoo ya yu'u mesa yee ya staa. Ti yukan ni jaa ĩn ñasi'i yinda'a ña ĩn tindo'o lulu alabastro. Ti ñu'un chitu aceite perfume mani ita nardo, ja nchaa ya'u xaan tonto. Ni ta'u ña tindo'o lulu un, ti ni chu'un ña perfume un xini Jesús.

⁴ Ti sava yivi kanchuku un, tu ni ka jajna'an ini i jniñu sa'a ña un. Ti ni ka ka'an i:

—Tu stivi ña un perfume un sia'an niku.

⁵ Sa ti ni kuya'u, ti ni'in ña xu'un ti kuu tejna'an yo nuu yivi nda'u niku —kachi da.

Ti ni ka kiti ini da nuu ña.

⁶ Ko ni kachi ya jiin da:

—Sia ña, ndoo ka skiti ra ini ña. Jniñu ni sa'a ña jiin ri, iyo va'a.

⁷ Yivi nda'u, chi nini kanchuku i jiin ra naa ra, ti nu ka kuni ra ti kuu chindee ra i. Ko ru'u, chi ansu sia'an ni kuncha ri jiin ra naa ra.

⁸ Ña'an ja'a ni sa'a ña nava iyo ini ña, chi ja ni chi'i tu'va ña perfume yiki kuñu ri ja kuu kivi kuñu ri.

⁹ Kuni ra ja ni tu'u ñuyivi, sava'ni ga nanu na ka'an i jnu'un ri ja na sketa'u ri yivi, ti kani i jnu'un

jniñu ni sa'a ña ja'a ja na nuku'un ini yivi un maa ña —kachi ya.

Judas nduku da nasa nakua'a da Jesús nuu sutu ka kuña'nu

(Mt. 26.14-16; Lc. 22.3-6)

¹⁰ Yukan ti Judas, ñin chaa ñuu Cariote, ja suni kandee da jiin ndi uxi uu ndaja'a un naa da, ni ja'an ndajnu'un da jiin sutu ka kuña'nu un, ti ni kachi da ja nakua'a da Jesús nuu da naa da.

¹¹ Nu ni ka jiniso'o chaa un jnu'un ni ka'an Judas, ni ka kusii xaan ini da, ti ni ka ka'ñu da xu'un nuu da. Yukan ti ni keja'a nduku da nasa nakua'a da Jesús nuu chaa un naa da.

Ni kuxini Jesús jiin ndaja'a ya

(Mt. 26.17-29; Lc. 22.7-23; Jn. 13.21-30;

I Co. 11.23-26)

¹² Maa kivi keja'a viko ka yee staa stila tu yi'i levadura un, suni kivi un ka ja'ni da lélú ja ka soko da ja kuu viko pascua. Ti ndaja'a ya ni ka jikajnu'un da ya:

—¿Nanu kuni ni ja na kin satu'va na ja kuxini yo vijna pascua? —kachi da jiin ya.

¹³ Yukan na ti ni taji ya uu da, ti ni kachi ya jiin da:

—Kua'an naa ra undi ñuu, ti yukan ndejna'an ra jiin ñin chaa ndiso ñin kiyi nducha, ti kundikun ra da ki'in ra jiin da.

¹⁴ Ti nuu ndivi da un, yukan ka'an ra jiin maa chaa xiin ve'e un: “Kachi maa Maestro na ja nanu iyo ñin ve'e ja kua'anuu ni nuu kuxini da jiin ndaja'a da vijna kivi pascua”, kachi ra.

15 Ti maa da na xna'an nuu ra ñin ve'e ka'nu ja kendo piso nuu sukun, ti yukan ja iyo nakoo, ti satu'va ra naa ra ja kuxini yo —kachi ya.

16 Ti kuankoyo da undi ñuu un, ti ni ka nani'in da taka nava ni kachi Jesús. Yukan ni ka satu'va da ja kuxini.

17 Nu ni kuaa, ti ni jaa Jesús ve'e un jiin ndi uxi uu ndaja'a ya.

18 Ti nu kanchuku da ka yee da staa nuu mesa un, ni kachi Jesús jiin da naa da:

—Jandaa na kachi ri ja ñin ro'o ja yee staa jiin ri ja'a, nakua'a ru'u nuu chaa ka jito u'u ru'u —kachi ya.

19 Ti ndaja'a un ni ka kukui'ya xaan ini da ja sia'an ni ka'an ya. Ti ndi ñin ndi ñin da ni ka kachi:

—¿Xi saña kuu nu? ¿Xi saña kuu nu? —kachi da naa da.

20 Ti ni kachi ya:

—Ja ndi uxi uu ro'o naa ra ñin ra kuu, ja chutoo staa stila nu ko'o ri, yukan kuu.

21 Kundaa nava yoso nuu tutu Yandios ja nakua'a da maa se'e Yivi Ñuyivi nuu chaa ka jito u'u ya. Ko xaan ga ka'nu nundo'o kondo'o chaa kin nakua'a ru'u. Sa nu tu ni kaku da niku —kachi ya.

22 Ni ka yee da staa. Ti ni ki'in Jesús ñin staa stila, ni jikanta'u ya nuu Yandios, ni sakuachi ya, ti ni tejna'an ya nuu ndaja'a ya, ti ni kachi ya:

—Kaji naa ra. Ja'a kuu nanu yiki kuñu ri —kachi ya.

23 Yukan na ti ni ki'in ya ñin vaso vino, ni nakuanta'u ya nuu Yandios, ti ni ja'a ya nuu da ja na ko'o da ti'li ti'li.

24 Ti ni kachi ya jiin da:

—Ti niñi ri un stuu ja ni sa'a Tata ri Yandios ñn tratu jaa. Ti yukan kuu ja ka'an ndaa kuiti ja nama ri siki kua'a xaan yivi, chi niñi ri ja kati ri ki'in, yukan kuu ja chunaa ri nuu yivi naa i.

25 Ko na kachi ndaa ri ja tukaa ga ko'o ri vino ja'a jiin ñanijna'an yo, kivi ka nasa'a i viko ja'a, undi na jaa kivi ko'o yo nuu kancha Tata ri Yandios, chi yukan kuu nuu ni'in ri ñn jniñu ña'nu ga, ti yukan ta'u ri jniñu jiin maa ya nuu tendi'i ni tu'u ja iyo. Ti yukan kuu nuu nasa'a jaa yo viko ja'a naa yo —ni kachi Jesús.

(Mt. 26.30-35; Lc. 22.31-34; Jn. 13.36-38)

26 Ni ndi'i ni ka kuxini da, ti ni ka jita da ñn himno, ti kuankoyo da undi yuku Olivos.

Kachi Jesús ja ndi'i nda'a ja'a ya kuichanuu da ti xndoo da ya

27 Yukan ti ni kachi Jesús:

—Tendi'i ra naa ra kuichanuu ti xndoo ra ru'u jakuaa vijna, chi sia'an ka'an nuu tutu Yandios: “Chi Yandios, kua'a ya jnu'un ja na kuū pastor, ti ri da un kuichanuu ti ki'in ti.”

28 Ko kivi na nandoto ri, ti koxnuu ri ki'in ri ñuu Galilea, ti yukan kundatu ri ro'o naa ra —kachi ya.

29 Yukan na ti ni kachi Pedro:

—Vasu tendi'i da na xndoo ni'in, ko saña tu xndoo kuiti na maa ni —kachi da.

30 Ti ni kachi Jesús jiin da:

—Jandaa na kachi ri nuu ra, ja kuu jakuaa vijna, nu ti kana ga li'i uu jinu, ti kachi ra uni jinu ja tu jini ra ru'u —kachi ya.

31 Ko Pedro, ni ini da ka'an da:

—Vasu na kuū na jiin ni, ko tu xndoo kuiti na ni'in —kachi da.

Ti tendi'i ndaja'a ya un, suni sia'an ni ka ka'an da.

Jikanta'u Jesús nuu Yandios nuu jardín Getsemani

(Mt. 26.36-46; Lc. 22.39-46)

³² Nu ni ka jakoyo da nuu nani Getsemani, ti ni kachi ya jiin da naa da:

—Ja'a ni kunchuku ra ti ru'u na kin kankanta'u ri nuu Yandios —kachi ya.

³³ Yukan ti kua'an ya ti'li ga ichi ndaku un jiin Pedro, Santiago jiin Juan. Ti ni keja'a kukui'ya xaan ini ya, ti kaña ini ya.

³⁴ Ti kachi ya jiin da:

—Jatu añu ri ja kukui'ya xaan ini ri, chi ja ni kuyajni kuū ri. Ko ja'a ni kundatu ra naa ra ti koto kusu ra —kachi ya.

³⁵ Yukan na ti ni jika ya ti'li ga, ti ni jakunjiti ya, ti jikanta'u ya, ja nu kuni Yandios, ti tu kondo'o ya nundo'o kii nuu ya.

³⁶ Ti ni kachi ya:

—Tata maa na, ja kuu maa ni, taka ni ja kuu sa'a ni. Nusa ti chajiyo ni saña nuu nundo'o vaji nuu na. Ko ansu nava kuni maa na, chi nava kuni maa ni —ni kachi ya.

³⁷ Yukan na ti na nandeokuñi ya nuu ka'iin ndaja'a ya un, ko ni jini ya ja ka kixi da, ti ni kachi ya jiin Pedro:

—Simón, ¿ja kixi ra nu? Tu ni kuu kundito ra vasu ñn hora nusa.

³⁸ Koto kusu ga ra naa ra. Kanajaa, ti kakanta'u nuu Yandios ja na kotu'va ra nava tu kotojnuni

ja'u'u un o'o, ti chisa'yí ra ru'u, kachi ra ja tu ka jini ra ru'u. Chi va'a ndiyo ini ra ja siuku ra, ko yiki kuñu ra, chi tu iyo ndee ini.

³⁹ Yukan ti kua'an tuku ya, ti ni jikanta'u ya, ti suni jnu'un un ni ka'an tuku ya.

⁴⁰ Nu ni nandeokuñi tuku ya, ni jini ya ja ka kixi tuku da, chi ka ji'i xaan da ma'na ja undi ka kuvée nduchi da, ti tu ni kujnuni nasa kachi da nuu ya.

⁴¹ Ti nu ni nandeokuñi ya jinu kuu uni, ni kachi ya jiin da:

—Vijna na, ndetatu ti kusu naa ra. Ko ja ni jaa hora ja ru'u, maa Se'e Yivi Ñuyivi, nakua'a da ru'u nuu yivi ka nchakuachi.

⁴² Ndoko naa ra na cho'o, chi ja vaji chaa ni nakua'a ru'u un —kachi ya.

Ni ka jnii da presu Jesús

(Mt. 26.47-56; Lc. 22.47-53; Jn. 18.2-11)

⁴³ Ni ka'an ga Jesús sia'an, ti ja ni chaa Judas, ñin ja ni kuu ndi uxi uu ndaja'a un. Ti vekoyo yivi kua'a jiin da, ka yinda'a i espada jiin yujnu. Vekoyo i jiin jniñu ni ka ta'u taka sutu ka kuña'nu jiin chaa ka xna'an ini veñu'un ka'nu un jiin taka chaa ka kuña'anu ñuu Israel.

⁴⁴ Ichi kuankoyo da ni kachi Judas jiin chaa un naa da:

—Chaa teyu'u ri nuu, chaa un kuu ja nanduku yo. Jnii naa ra. Koto sia ra ki'in —ni kachi da.

⁴⁵ Ti nu ni jaa Judas, ni tu'va da nuu Jesús, ti ni kachi da:

—Maestro, maestro —kachi da.

Ti ni teyu'u da nuu ya.

⁴⁶ Yukan ti chaa un ni ka jnii ni da ya.

47 Ti ñin chaa ka'iin jiin Jesús un, ni jista da espada da, ti ni ja'ncha da so'o ñin muzu sutu kuña'nu ga.

48 Yukan na ti ni kachi Jesús jiin chaa ni ka jñi ya un:

—¿Va nu ñin ñakui'na kuu ri ja vekoyo ra jiin espada jiin yujnu ja jñi ra ru'u ki'in ri presu nu?

49 Ti taka kivi ni xna'an ri nuu ra naa ra ini veñu'un ka'nu un, ti tu ni ka jñi ra presu ru'u. Ko sia'an kuu ja na kundaa nava ka'an nuu tutu Yandios —kachi ya.

50 Ti yukan tendi'i ndaja'a ya ni ka jinu da kuankoyo da.

51 Ko ñin chaa lulu ni chindikun da jata yivi kuankoyo jiin Jesús, ti suku da nini ñin sa'ma, ti suni ni ka jñi chaa un maa da.

52 Ko ni keni'ni chaa lulu un chii sa'ma un, ti vichi lii da, ko ni kundee da kua'an da.

*Chaa ka kuña'nu ñuu Israel ka xndichi da Jesús
(Mt. 26.57-68; Lc. 22.54-55, 63-71;
Jn. 18.12-14, 19-24)*

53 Yukan ti kuankoyo yivi un jiin Jesús undi ve'e ñin sutu kuña'nu ga, chi yukan ni ka ndututu taka sutu ka kuña'nu un, taka chaa ka kuña'nu jiin taka chaa ka xna'an ley ini veñu'un ka'nu un.

54 Ti Pedro ndikun jika da ichi jata chaa kuankoyo jiin Jesús, ni kivi da yuxe'e palacio un, ti ni nukoo da jiin policia un ka nanduxin da yunu'un.

55 Ti sutu ka kuña'nu un jiin taka chaa ka kuña'anu ñuu Israel, ka nduku da nasa ka'an kuachi ga da siki Jesús, chi ka kuni ka'ni da ya. Ko tu kujnuni na jnu'un ga ka'an da.

⁵⁶ Ti kua'a yiví ni ka xndoña'an, ja ka chakuachi siki Jesús, ko tu ni kejna'an kuiti jnu'un ka ka'an da.

⁵⁷ Ti sandi'i ni ga ni ka ndokuiñi sava da, ti ni ka kankuachi da siki ya sia'an:

⁵⁸ —Saña naa na, ni ka jiniso'o na jnu'un ni ka'an da: “ru'u, xnaa ri veñu'un ja'a, ja ni ka sa'a yiví naa i jiin ndaja'a i, ti nuu uni kivi, ti na sa'a tuku ri inga veñu'un ja tu kuu jiin nda'a yiví”, sia'an ni kachi chaa jña —kachi da naa da.

⁵⁹ Ko vasu sia'an, tu ni keja'an tuku jnu'un ka ka'an da siki ya.

⁶⁰ Yukan na ti ni ndokuiñi maa chaa kuu sutu kuña'nu ga un nuu chitu un, ti ni jikajnu'un da Jesús: —¿Tu ka'an kuiti ra nusa? ¿Xi jandaa kuu jnu'un ka ka'an da siki ra nu? —kachi da jiin ya.

⁶¹ Ko Jesús tu ni ka'an kuiti ya. Yukan na ti ni jikajnu'un tuku sutu kuña'anu un ya:

—Kachi nu maa ra kuu Cristo, Se'e Yandios ii, ja kancha andivi —kachi da.

⁶² Ti ni kachi Jesús:

—Maa ri kuu, ti kuni ra naa ra ja maa Se'e Yiví Ñuyiví, nukoo ya nda'a kua'a Yandios ti kuña'nu ya jiin ya. Suni kuni ra nchaa ya ñuyiví ja'a nuu viko andivi un —kachi ya.

⁶³ Nu ni jiniso'o sutu ña'nu ga un, ni ndata da sa'ma da ja ni kití ini da, chi ni ndo'o ini da ja yisikincha Jesús maa Yandios jiin jnu'un un. Ti ni kachi da jiin yiví ka'iin un:

—¿Nau inga testigo nandi'i yo ja'a naa yo?

⁶⁴ Ja ni ka jiniso'o ra ja ka'an ndeva'a da siki Yandios. ¿Nasa ka ndo'o ini ra naa ra? —kachi da.

Ti tendi'i yiví un ni kachi ja na kuū ya.

⁶⁵ Yukan na ti sava yivi un ni ka tivi si'i nuu ya. Ni ka jasi nduchi ya jiin sa'ma, ti ni ka kani jiki nuu ya, ti kachi:

—ro'o chaa ka'an jnu'un Yandios, kachi nau ja ni kani ro'o —kachi jiin ya.

Yukan na ti soldado ka'iin un, ni ka ja'a jiki nuu ya. Yukan kuu ja ni jna'an Jesús nu ni ka xndichi da ya.

Kachi Pedro ja tu jini da Jesús

(Mt. 26.69-75; Lc. 22.56-62;

Jn. 18.15-18, 25-27)

⁶⁶ Ti nukoo Pedro nuu yuxe'e un, ti in ña'an junukuachi ve'e sutu kuña'anu ga un, ni ya'a ña ichi chukan.

⁶⁷ Ti nu ni jini ña nduxin da ñu'un, ni nde'e va'a ña nuu da, ti ni kachi ña:

—ro'o, suni ni yaku ra jiin Jesús, chaa ñuu Nazaret un —kachi ña jiin da.

⁶⁸ Ko Pedro ni kachi da ja tu jini da:

—Tu jini ri na jnu'un ka'an ra jiin ri —kachi da.

Ti ni kenda da kua'an da ichi yuxe'e un ni jakuñi da. Ti yukan ni kana in li'i.

⁶⁹ Ñaa junukuachi un, ni jini tuku ña nuu da, ti ni keja'a ka'an ña jiin taka yivi ka'iin un:

—Suni ndaja'a chaa yukan kuu chaa ja'a —kachi ña.

⁷⁰ Ko Pedro ni kachi tuku da ja tu jini da. Ni kuu nuu ga, ti chaa ka'iin un ni ka kachi da jiin Pedro:

—Ndaa ndixia kuu ja ro'o kuu in ndaja'a Jesús un, chi suni chaa Galilea kuu ra —kachi da.

⁷¹ Ko ni kachi tuku Pedro:

—Va kunchakuachi na nu na xndoña'an na, ko ka'an ndaa kuiti na ja tu jini na chaa ka ka'an ni un —kachi da.

⁷² Ko ni ka'an ga da sia'an, ti ni kana li'i jinu kuu uu. Ti yukan ni nuku'un ini da jnu'un ni ka'an Jesús: “Nu ti kana ga li'i jinu kuu uu, ti kachi ra uni jinu ja tu jini kuiti ra ru'u.” Ti yukan ni nakani xaan ini da, ti ni jakunchaa da nde'e da.

Xndichi Pilato Jesús

(Mt. 27.1-2, 11-14; Lc. 23.1-5; Jn. 18.28-38)

15

¹ Nu ni kundijin inga kivi, ni ka ndajnu'un sutu ka kuña'nu un jiin taka chaa ka kuña'nu, suni chaa ka xna'an ley ini veñu'un ka'nu Israel, jiin uu ga chaa ka kuña'nu ñuu un. Ka ndajnu'un da nasa sa'a da jiin Jesús, ja ni ka jni da ya. Yukan na ti ni ka ju'ni da ya, ti kuankoyo da jiin ya nuu Pilato, chaa kuu gobernador.

² Ti Pilato ni jikajnu'un da Jesús:

—¿Xi ro'o kuu Rey, ja ta'u jniñu nuu ni tu'u nación Israel nu? —kachi da.

Ti ni kachi Jesús:

—Ru'u kuu —kachi ya.

³ Ti sutu ka kuña'nu un ni ka chakuachi da tijni nuu jnu'un siki ya.

⁴ Ti ni jikajnu'un tuku Pilato un ya:

—Nde'e na ka chakuachi da siki ra, ¿ti tu ka'an kuiti ra nusa? —kachi da.

⁵ Ko Jesús tu ni ka'an kuiti ya. Ja yukan na ti so ni naa ini Pilato, ti tu kujnuni nasa sa'a da jiin ya.

Ni kachi Pilato ja na kuñ Jesús

(Mt. 27.15-31; Lc. 23.13-25; Jn. 18.38-19.16)

⁶ Taka viko pascua ni iyo ñn jnu'un ja na sia Pilato ñn chaa kande vekaa, nau ja na kachi maa yivi un.

⁷ Ti kivi un kande ñn chaa nani Barrabás vekaa jiin tijni chaa ni ka ndonda siki gobierno, chi ni ka ja'ni da ndiyi.

⁸ Ja yukan kuu ja ni ka jakoyo yivi un ka jikan i nuu Pilato, ja na sia da ñn presu nava iyo jnu'un da.

⁹ Ti ni jikajnu'un Pilato nuu yivi un:

—¿Kuni ra naa ra ja na sia ri chaa kuu Rey nuu ni nación Israel nu? —kachi da.

¹⁰ Sia'an ni jikajnu'un Pilato, chi ni jini da ja ka kuu kuasun ini sutu un, ja kua'a yivi ni ka kandixia jnu'un ni ka'an Jesús. Ja siki yukan ni ka nakua'a da ya nuu Pilato, ti Pilato kuni sia da Jesús niku.

¹¹ Ko sutu ka kuña'nu un ni ka ska'an da yivi ja na kakan i nuu Pilato, ti na sia da chaa nani Barrabás.

¹² Yukan na ti ni jikajnu'un tuku Pilato yivi un:

—Nusa ti, ¿ndoo kuni ra naa ra ja sa'a ri jiin chaa ja'a, chaa ka skonani ra Rey nación Israel nusa? —kachi da.

¹³ Ti ni ka kuvaa yivi un ka kana ko'o:

—¡Katakaa ni chaa jña nda'a cruz, na kuū da! —kachi naa.

¹⁴ Ti ni kachi Pilato:

—¿Ko nau kuachi ni sa'a da nusa? —kachi da.

Ti yivi un vi'i ga ka kana ko'o:

—¡Katakaa ni chaa jña nda'a cruz, na kuū da! —kachi naa.

¹⁵ Yukan na ti Pilato, ja na kusii ini yivi un jiin da, ni sia da Barrabás kua'an da. Ti ni ta'u da jniñu nuu soldado un ja na kani da Jesús jiin yo'o ñii, ti

na ki'in da jiin ya ja na kundaka ya nda'a cruz, ti na kuū ya.

Ni ka yisikin chaa soldado un Jesús

¹⁶ Yukan na ti kuankoyo soldado un jiin Jesús undi nuu yuxe'e palacio nuu nani Pretorio. Ni ka nastutu jna'an da jiin tendi'i ga soldado.

¹⁷ Ti ni ka naskui'na da ya ñin sa'ma kua'a ndi'i. Ni ka sa'a da ñin corona iñu, ti ni ka chuxndee da xini ya.

¹⁸ Yukan ti ni ka keja'a ka kanajiin da, ka sakata da nuu ya:

—Na kuchaku na'an Rey, chaa ñuu Israel —kachi da.

¹⁹ Ni ka kani da yujnu xini ya, ni ka tivi si'i da nuu ya, ti ni ka jakunjiti da nuu ya, nanu ja kuu ya ñin rey.

²⁰ Ni ndi'i ni ka sakata da nuu ya, ni ka tava da sa'ma kua'a ndi'i ñu'un ya, ti ni ka naskui'na da ya jiin sa'ma maa ya. Ti kuankoyo da jiin ya ja ka taka da ya nuu nda'a cruz.

Ni ka jatakaa da Jesús nuu nda'a cruz

(Mt. 27.32-44; Lc. 23.26-43; Jn. 19.17-27)

²¹ Ichi kuankoyo da ni ka ndejana'an da jiin ñin chaa ñuu Cirene nani Simón, ja chaa kuu tata Alejandro jiin Rufo, vendi da ja ni ja'an da nuu rancho da, ti soldado un ni ka chayika Simón ja na kundiso da cruz Jesús.

²² Sia'an kuankoyo da jiin Jesús undi ñin ñu'un nani Gólgota, ja kuni ka'an, “ñu'un yiki xini.”

²³ Nu ni ka jakoyo da yukan, ni ka ja'a da vino sakanuu jiin ñin nuu suxia ja nani mirra, ja na ko'lo

ya nava tu kondo'o xaan ya ja jatu ya. Ko maa Jesús tu ni janta'u ya ja ko'o ya.

²⁴ Yukan na ti ni ka chijnii da ya nuu nda'a cruz jiin nduyukaa. Ti soldado un ni ka chu'un da suerte siki sa'ma ya, ja na tejna'an nuu jna'an da.

²⁵ Ja ni kuu ka ñin jaña'an na ni ka jatakaa da Jesús nuu nda'a cruz.

²⁶ Ti xini cruz un ni ka chijnii da ñin tutu ja ka'an ndoo yindaka ya yukan. Kachi sia'an: “Ja'a kuu Rey nuu yivi nación Israel.”

²⁷ Suni ni ka jatakaa da uu ñakui'na jiin ya nuu uu ga cruz, ñin ichi nda'a kua'a, ti inga ichi nda'a sajni ya.

²⁸ Sia'an ni kundaa nava yoso nuu tutu Yandios ja kachi: “Ka'ni da ya nanu ñin ñakui'na.”

²⁹ Ti yivi ka ya'a ichi chukan, ka skuiko xini ja ka kuu ichi ini nuu ya, ti ka ka'an ndeva'a:

—Vijna na ti ro'o ja ni ka'an ra ja xnaa ra veñu'un ka'nu Israel, ti nuu uni kivi ti na sa'a jaa ra.

³⁰ Nama maa ra vijna, ti kuan kuun nuu nda'a cruz jña —kachi jiin ya.

³¹ Suni taka sutu ka kuña'nu un jiin chaa ka xna'an ley ini veñu'un un, ka ka'an ndeva'a kuiti da nuu ya, ti ka ndajnu'un da:

—Ni nama da sava yivi, ko tu kuu nama da maa da vijna.

³² Ko vijna ti nu na kandixia yo ja ka'an ndaa da ti kuun da nuu nda'a cruz un, ti sa na kandixia yo ja kuu da Cristo ni taji Yandios, ja kuu da Rey nuu ni tu'u nación Israel. Yukan ti kandixia yo ja vaji da undi nuu andivi —ni ka kachi da.

Ti suni undi uu ga chaa ka ndakoyo yukan jiin ya, ni ka ka'an ndeva'a da nuu ya.

Ni ji'i Jesús

(Mt. 27.45-56; Lc. 23.44-49; Jn. 19.28-30)

³³ Nu ni kuu sava nduu, ni kuñaa ni tu'u ñuyivi, ti ni ndundijin undi ka uni ja'ini.

³⁴ Ti hora un ni kanajiin ko'o Jesús:

—Eloi, Eloi, ¿lama sabactani? —kachi ya. (Ja kuni ka'an: “Yandios maa na, Yandios maa na, ¿ndoo ni xndoo maa ñin ni saña vijna”? —kachi ya.)

³⁵ Sava yivi ka'iin yajni yukan ni ka jiniso'o, ti ni ka kachi:

—Kunso'o naa ra, chi kana da xini profeta Elías na jana'an—kachi da.

³⁶ Yukan ti ñin da ni ja'a corri, ni chutoo da kachi nuu vino iya, ni chuxndee da xini ñin nuyoo kani, ti ni ja'a da ja na ko'o Jesús, ti kachi da:

—Na nde'e yo nu kii Elías kii nama da chaa —ni kachi da:

³⁷ Ko Jesús, uni ni kanajiin ko'o ya, ti ni ji'i ya.

³⁸ Ti maa hora ni ji'i Jesús, ni te'nde sava sa'ma ii yindaka ini veñu'un ka'nu Israel un, ni ndata sava kuiti sa'ma un undi nuu sukun ti undi nuu ja'a.

³⁹ Ti ñin soldado kuu capitán kandichi nuu Jesús hora un. Nu ni jini da nava ni ji'i Jesús, ti ni kachi da:

—Jandaa kuiti kuu ja Se'e Yandios ni kuu chaa ja'a —kachi da.

Yukan ni ji'i Jesús.

⁴⁰ Suni ka'iin sava ñasi'i ka jitonchaa jika ña. Ñaa un kuu María Magdalena, Salomé, jiin María nana Santiago, chaa suchi, jiin José.

41 Ñaa ja'a ni ka kandixia ña Jesús. Ni ka yaku ña jiin ya, ti ni ka junukuachi ña nuu ya na ni yaku ya ñuu Galilea. Suni yukan ka'iin tijni ga ñasi'i ja ni ka ja'an ña jiin ya undi Jerusalén.

Ni ka chunduji da Jesús

(Mt. 27.57-61; Lc. 23.50-56; Jn. 19.38-42)

42-43 Ti ñn chaa ñuu Arimatea, nani José, ni kuu da ñn chaa kuña'nu ja kuu nuu junta ka'nu Israel. Ti ndiyo ini da ja kuni da nu na jaa kivi ta'u Yandios jniñu. Chi ni kandixia da jnu'un ni xna'an Jesús ja kuu kivi koyo yivi nda'a Yandios ja na ta'u ya jniñu nuu i, ti yukan ni'in yivi un ñn ta'u ya ti kundisojniñu i jiin ya. Ti vanuxia ja ni jaa vispera kivi ndetatu, ti ni tava ini da ni ka'an da jiin Pilato ja'ini kivi un, ti ni jikan da permiso ja na ki'in da jiin yiki kuñu Jesús.

44 Ti Pilato ni naa ini da nu ni jiniso'o da ja, ja ni ji'i Jesús. Ni kana da capitán soldado un, ti ni jikajnu'un da nu ja ni ji'i ndixia ya.

45 Ti capitán un ni kachi ja, ja ni ji'i ndixia ya. Yukan na ti Pilato ni ja'a da permisuu nuu José ja na ki'in da jiin yiki kuñu ya.

46 Ti José ni jaan da ñn sa'ma finu, ni kuni'in da yiki kuñu ya nuu nda'a cruz un, ti ni nasuku da yiki kuñu ya. Yukan ti ni chunde da ya ñn yau jaa, ja ni jacha da chii ñn kava. Ti ni nakasi da jiin ñn yuu ka'nu xaan.

47 Ti María Magdalena jiin inga María nana José, ka'iin ña yukan, ti ni ka jini ña nuu ni ka chunde da Jesús.

Ni nandoto Jesús

(Mt. 28.1-10; Lc. 24.1-12; Jn. 20.1-10)

16

¹ Nu ni ya'a kivi ndetatu un, ti María Magdalena jiin inga María, nana Santiago, jiin Salomé, ni ka jaan yachi ña perfume ja kin chi'i ña siki yiki kuñu Jesús.

² Ña'an xaan kivi ni nukuñi semana kuankoyo ña yu'u ñaña un. Ja ni kaña ndaa ndikandii ni ka jakoyo ña nuu ñaña un.

³ Ti ichi kuankoyo ña ka ndajnu'un ña:

—¿Nanu ni'in yo ñin ja chajiyo yuu nuu ñaña un?
—kachi ña.

⁴ Nu ni ka jakoyo ña, ti ni ka jini ña ja, ja ni kuxio yuu ka'nu un.

⁵ Ni ka kivi ña ini yau un. Yukan ni ka jini ña ñin ángel Yandios nukoo nda'a kua'a. Ti ñu'un ya ñin sa'ma kani, xkiyi ni'ni. Ni naxna'an ya nuu ña nanu ñin chaa lulu. Ti ña'an un ni ka yu'u ña.

⁶ Ko ángel un ni kachi:

—Koto yu'u ra naa ra. Chi jini ri ja ka nanduku ra Jesús, chaa ñuu Nazaret ja ni ji'i nuu nda'a cruz un. Ko tuu kande ya ja'a, chi ja ni nandoto ya. Nde'e, ja'a kuu nuu ni ka xndoo da yiki kuñu ya, ko tukaa ndoo iyo.

⁷ Vijna ti kua'an naa ra ti kachi ra nuu Pedro, ti suni nuu uu ga chaa ka kuu ndaja'a ya: “Koxnuu ya ki'in ya ñuu Galilea, ti yukan kundatu ya ro'o naa ra. Ti nakuni ra ya nava ni kachi ya jiin ra naa ra” —kachi ángel un.

⁸ Ti ña'an un ni ka kee ña ini yau un, ti ni ka ja'a ña corri, chi ni ka yu'u xaan ña ja undi ka ni'in ña, ti so ni ka sana ini ña. Ko tu ni ka kachi ña nuu ni ñin yivi ja sia'an ni kuu, chi ni ka yu'u xaan ña.

*Ni ndenda Jesús nuu María Magdalena
(Jn. 20.11-18)*

⁹ Jaña'an kivi ni nukuiñi semana, nu ni nandoto Jesús, ti xnakan ni ndenda ya nuu María Magdalena, ñaa ni keni'in ya uxia tachi xaan yukan.

¹⁰ Ti maa ña ni jan kaxnu'un nuu uu ga chaa ni ka jika jiin ya. Chi ka na'nu da ya, ka kukui'ya xaan ini da, ti ka nde'e da.

¹¹ Ko nu ni ka jiniso'o da ja chaku Jesús, tu ni ka kandixia da, vasu kachi ña un ja ni ndejna'an ña jiin ya.

*Ni ndenda Jesús nuu uu chaa ni kuu ndaja'a ya
(Lc. 24.13-35)*

¹² Kuee ga, ti ni ndenda Jesús sii tuku nuu uu chaa ni ka kuu ndaja'a ya ichi kuankoyo da ranchu da.

¹³ Chaa un, ni ka nandeokuñi da, ti ni ka kachi da nuu uu ga ndaja'a un, ko suni tu ni ka kandixia da jnu'un un.

*Ni ndenda Jesús nuu uxi ñn ndaja'a ya
(Mt. 28.16-20; Lc. 24.36-49; Jn. 20.19-23)*

¹⁴ Sandi'i ni ga, ni ndenda Jesús nuu uxi ñn ndaja'a ya nuu kanchuku da ka yee da staa. Ti ni kanajiin ya nuu da naa da, ndoo tu ka kandixia da ja ni nandoto ya, ndoo xaan ga ni'in ni nduu ini ra naa ra ja tu ka chunso'o ra jnu'un ka ka'an yivi ni ka ndejna'an jiin ya, chi ni ka kachi i ja, ja ni nandoto ya.

¹⁵ Yukan na ti ni ta'u ya ñn jniñu nuu da naa da, ti ni kachi ya:

—Kuankoyo naa ra ni tu'u ñuyivi, ti ka'an ra jnu'un Yandios nuu taka yivi naa i.

¹⁶ Yiví kandixia, ti kuanducha i, ti nanita'u i nuu Yandios. Ti yiví tu kandixia, na jna'nu ndatu i jiin kuachi i.

¹⁷ Yiví na kandixia ti kuu sa'a i jniñu ña'nu jiin siví ri. Kuu kenchara da tachi xaan ki'in. Ti ka'an da yu'u inga yiví ja tu ka jini da.

¹⁸ Nu na ku'uun ini ra ti jni ra ñin koo, xi ku'uun ini ra ti ko'o ra veneno, ti tundo jna'an kuíti ra. Chuxndee a nda'a ra siki yiví ka ku'u, ti nduva'a i —kachi ya.

Kuano'on Jesús andiví

(Lc. 24.50-53; Hechos 1.9-11)

¹⁹ Nu ni ndi'i ni ka'an Jito'yo Jesús jiin ndaja'a ya, ti ni ndaa ya kuano'on ya andiví. Ti ni nukoo ya nda'a kua'a Yandios nuu ni nduñá'nu ya kancha ya.

²⁰ Ti ndaja'a ya jiin chara ka skua'a jiin ya, ni ka yaku da taka ñuu ni ka ka'an da jnu'un Yandios nuu yiví naa i. Ti maa Jito'yo ni chindee chituu ya da jiin jniñu ña'nu ni ka sa'a da, ti ni ka jini yiví ja iyo ndaa jnu'un ni ka ka'an da.

Ja'a kuu jnu'un Yandios ni chara Marcos.

Nuevo Testamento en mixteco de Yosondúa
New Testament in Mixtec, Yosondúa (MX:mpm:Mixtec,
Yosondúa)

copyright © 1988 Wycliffe Bible Translators, Inc.

Language: Mixtec, Yosondúa

Translation by: Wycliffe Bible Translators, Inc.

Mixteco, Yosondúa [mpm], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Yosondúa

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
28a989a2-bd36-59ff-b10d-452e0cb74797